



耳溪集  
十二

神道碑  
墓碣銘

共二十二

~ 16  
2330  
12



和  
2330  
21-12

耳溪集卷二十六目

神道碑

弘文館校理學圃梁公神道碑

工曹佐郎梁公神道碑

司憲府大司憲贈吏曹判書忠正李公神道碑

左議政李公神道碑

判中樞府事趙公神道碑

禮曹判書李公神道碑

知中樞府事柳公神道碑





勸留書室公起拜而辭曰臨民聽訟之堂非邑子所居方伯巡到召見之欲試其才命題以天地日月公請紙筆卽書曰天地爲吾量日月爲吾明方伯驚異之手書以贈曰海鶴之姿秋月之精他日龍門大闡芳名自是一道稱梁神童十三就學于知止堂宋公欽留數日論性理之學宋公嘆曰吾東傳道之責其在斯人語主守曰古稱子國有顏子今子邑之梁秀才是也自是從學於宋公與同門羅松齋世續宋俛仰純爲道義之交常以小學律身精密篤實德器漸成及長聞靜菴趙先生倡明正學執贄遠訪昂然有

致君澤民之志先生爲之畏服稱以需世之大器

中廟五年庚午中生員第二名靜菴爲同榜進士第一相從講質無虛日靜菴常曰吾與梁同年語如芝蘭之薰人也贊其氣像曰霽後秋天纖雲初捲明月皎皎人欲淨盡丙子又中文科選湖堂聲名蔚然尋入瀛館 中廟方銳意求治公以堯舜君民爲已任程朱道學爲宗旨每入經筵必整衣肅容齋心積誠對方冊如敬神明 上問孔門之學所業何事對曰仁而已矣 上問何謂之仁復對曰仁人心也聖人因其本然之心先致其知而誠其意發爲仁政措諸

事業故正朝廷理萬民必本於是心 上稱善時靜  
菴感不世之遇負兼濟之責便欲唐虞斯世與冲菴  
金公援引同志協力共貞朝著肅清公與金大柔金  
老泉奇子敬安順之蔡英之往候鄭文翼公光弼鄭  
公曰贊襄治道專在玉堂今見公輩吾無憂矣一夜  
南袞以竹杖便服乘月來訪曰當今經濟之策吾難  
獨任環顧朝著可與共事者無出公右公其不我遺  
耶公正色答曰如有經濟之志何不見趙光祖乎我  
遐方之人高官顯職自是分外協贊之責尤何敢當  
袞誘說百端公終不應袞知其不可屈去謂人曰嘗

聞南方之人寬和今見梁某愚而復決不可用也當  
時講官稱四學士公及奇遵朴世熹崔山斗是已與  
之更日侍講公進言曰大學之止至善中庸之致中  
和卽人主爲學之極功而其本在於明德率性其要  
在於慎獨真實之誠主一之敬卽一心之主宰萬事  
之綱領聖學所以徹頭徹尾者也尤嚴於賢邪進退  
之幾曰陰陽爲天地之大對君子小人互爲消長自  
古聖王深軫扶抑之方君子之進如茅斯拔小人之  
退如廬斯剝此否泰二卦所以占治亂之源也在前  
席援據經傳開釋旨義自天人性命之理王霸公私

耳溪集 卷二十六  
之辨縱橫反覆不避繁複惟期開發 聖心朝講輒  
至日吳晝講或致宵分 上竦然傾聽然聖體疲倦  
或欠伸作氣御床戛戛有聲羣小傍伺暗揣咸思陰  
中之計公性度溫粹體若不勝衣言若不出口而至  
於辨別淑慝勇往直前且以名節砥礪有意激揚頽  
俗嘗與靜菴論及靖國勲曰成希顏朴元宗輩雖有  
大勲素無學識且陷於柳子光之譎計猥錄其子弟  
之無尺寸勞者人心咸憤此非朝家小事也靜菴曰  
塞利源勵世道莫先於削勲錄也已卯冬靜菴爲大  
司憲與諫長李成童合啓請削勲券之僞濫者 上

不允公爲弘文校理與副提學金練應教奇遵修撰  
沈達源聯劄極論 上引見諭以重難之意十一月  
靜菴又連啓之爭甚力十一日 上不得已許之時  
南袞爲清議所不容常怏怏至是知 上意厭儒臣  
與勲臣花川君沈貞南陽君洪景舟密議先以巧舌  
危言宣播宮禁假造蟲篆恐動天聽至十五日諸臣  
將稟定勲券之當削者是夜袞貞景舟等從神武門  
乘昏潛入合啓趙光祖等謀不軌事機甚急其辭曰  
奸黨朋比聲勢相倚誣上行私國勢顛倒請付有司  
明正其罪皆詣閣外張燭列坐公方在禁直與承旨

耳溪集 卷二十六  
尹自任注書安珽相語曰安有政院玉署不知而潛入之事乎俄而中使申順剛出召兵曹叅議成雲爲承旨雲趨入安珽攀雲帶曰史官在此承旨何敢獨入雲撞珽臂而去飭門者禁他人公與珽皆不得入三更緹騎四出逮囚趙光祖金淨等八人于獄將殺之公聞諸公在囚酌酒相訣之語不勝悲憤仰天垂涕館學生及坊民樂工吏胥等皆聯章訟冤守闕號哭公尤不欲生與典翰鄭膺率館僚抗疏力爭曰國之有士猶人有元氣氣喪則人亡士歿則國喪建寧之黨禍起而漢祚衰熙豐之正士銷而宋室危斯固

然之明鑑旣覆之前轍也言極剴切至於叩頭流血時領相鄭光弼涕泣牽裾天怒少霽遂得減死分配靜菴綾城冲菴錦山凶黨又啓公及叅贊李耆應教奇遵承旨朴世熹并請拿處賴領相力救公與李耆獨免公卽歸綾城舊居靜菴適配此土日夕相從靜菴曰吾兩人得從遊於此殆不偶爾與之切偲以遂初志庶無大過矣未幾李蘋爲大司諫李沆爲大司憲十二月十三日合啓請加律趙光祖黨并書公名及安塘金安國李若水等三十九人于一紙以啓又請罷賢良科公惴惴若不保朝夕與靜菴相守每以



處困不失亨交勉怡然忘其牢騷一日靜菴謂公曰  
吾儕此禍實係時運歎之何益吾則死耳二十日靜  
菴賜死之命至公執手相訣皆無一言但曰自靖獻  
吾王而已吾輩幾何不相從耶是日大雪深尺餘  
風淒日慘人不堪其寒公獨坐謫廬外終日哭泣親  
看斂殯設奠致哀還家誦愛君如愛父憂國若憂家  
之句悲歌擊節曰恨不與斯人同歸每逢其受命之  
日必齋沐奠酒果痛哭乃止袞旣殺靜菴又議定黨  
人之律或削奪官爵或付處或罷職外補凡三十七  
人而公名在削奪中於是善類竄逐盡矣越二年辛

巳冬宋祀連急書告安處謙與詩山正謀殺袞逮詔  
獄鍛鍊袞又上疏曰安塘以無狀小人任銓衡爲領  
袖趙光祖等二十二人分授清要管執樞機異已者  
則曰心術不正附已者則曰頗有經術羣聚結朋今  
其餘黨包藏禍心爲梟爲獍幸賴天佑凶謀敗露請  
嚴刑峻法明示顯罰遂標榜禁錮公自靜菴死後屢  
登凶啓禍將不測遂絕意世事築小堂于中條山中  
扁其堂曰學圃左右圖書不出戶庭襟懷冲澹而持  
敬益嚴言行動遵矩矱教訓子弟納於義軌家庭肅  
然如朝廷南中學者多摳衣請業公皆謝遣曰獨不

見晦翁黨錮後蔡西山血脚事耶癸巳 中廟始悔  
先放流配人公亦與金正國諸人並蒙收敘公終不  
出人有勸之曰 上心幡然善類甄復何不一出展  
所學耶公搖手止之曰吾爲世大僂何顏更出遂託  
以痼疾益自韜晦未幾金安老用事復錮黨人禍烈  
前日人始服公之先見丁酉都憲梁淵劾安老賜死  
公及柳仁淑首蒙甄用召以經筵雷肆終不膺末乃  
除龍潭縣令公曰君命不可屢辱強赴任治化大行  
有猛虎橫行多殺傷人公爲文祭于山自是虎徙他  
境人以比古之北渡河未幾棄歸乙巳 仁廟卽阼

臺啓請敘黨人太學疏請靜菴復爵 上卽允之是  
歲七月 上昇遐公號痛日夜竟以八月十八日終  
于家享年五十八葬于綾之雙峰里公以高明之姿  
純正之學遭逢盛時羣賢彙征庶幾致三代之隆不  
幸壬人媾禍網打善類廢斥田野若將終身及至  
孝陵嗣位邦運回泰死者伸而竄者召庶幾挽回世  
道復見至治昊天弗吊 龍馭遽昇公亦未踰月而  
歿嗚呼民之無祿於公何憾焉世之論者以信道直  
前觸忤物情病已卯士類或謂之好名喜事者有以  
激成雖以金思齋之學識亦曰鷄鳴煩啓事近逼迫

日吳罷講自速厭倦正如元祐黨人當分其責之語  
惟退溪先生曰今世爲士者猶知尊王道黜霸術尙  
正學排異端者伊誰之功歟斯可謂不易之正論矣  
崇禎三年士林建請以公配靜菴暇享于綾州竹樹  
書院又以子松川公貴推恩贈吏曹叅判公之立朝  
厯四載官職踐歷平日著述逸於兵火皆無傳焉配  
錦山金氏銛女繼配清州韓氏孝恭女子長應箕有  
學行應台禮曹叅議應鼎並魁生員文科重試三場  
官大司成世稱松川應畢應德皆叅奉應國早卒女  
歸進士鄭仁富叅奉鄭仁洪側室男知遜能文章叅

奉知命早夭應箕子山立以孝贈戶叅山翰早卒山  
秀軍資監正山浚早卒山迥宣務郎女歸生員高季  
英應台子山厚別提山重女歸文九容以烈旌閭金  
洪均進士應鼎子山海贈戶叅山龍生員以孝旌閭  
山璿工曹佐郎以忠立祠旌閭贈左承旨山軸以孝  
旌閭女歸金弘漢李慶男軍資正金光運進士以烈  
旌閭側室男羲之叅奉應畢子山旭禮賓奉事應德  
子山杭寧海府使女歸安重武應國無嗣女歸鄭昕  
文科監察鄭仁富子復叅奉行待鄭仁洪子溟滌沐  
皆進士溧縣監銘曰

國朝中興之業莫盛於丙寅之靖國而士林斬伐之禍莫烈於己卯之僭毒蓋其千載遭逢明良相得一朝危讒如入左腹余讀史至此未嘗不掩卷而太息也人或謂求治太銳責難無漸有違於大易之納約然使斯人正誼而明道尊王而黜霸是誰之力也惟公進退不失其正出處不變其確超然爲元祐完人竊余仰其高識鐫此數尺之石永垂後人之式

工曹佐郎梁公神道碑

并序

公諱山璿字會元耽羅星主良氏之後也新羅賜姓梁入我朝有弘文校理彭孫與靜菴趙先生共贊至

治同邁士禍世稱學圃先生卽公大父也考諱應鼎以文章德望重一世官大司成號松川妣貞夫人竹山朴氏判官仲允女以皇明 世宗四十年辛酉生公卽我 明宗十六年也公儀容端粹聰穎好學及長專心經典不屑公車業博涉羣書傍通天文地理且究兵學松川公甚器異之授以陣圖窮其合變之術辛巳遭松川公憂率禮無愆是時牛溪成先生講道于坡山公負笈千里而就質焉先生深許其精詣公夜觀乾象晝察人事知大亂將作每登高望遠獻歎流涕乃卜居于羅州南三鄉里距家百餘里日觀

偏親步行習勞人皆恠之丁亥三月倭犯興陽殺鹿  
島萬戶李大源公歎曰邊警若此而人無憂者奈何  
戊子春倭人遣對馬島橋康光求和公曰禍在不遠  
矣欲覘倭情馳往南原見宗人梁大樸請與俱踰八  
良峙入嶺南托護行卒密探於諸倭始知日本王源  
義藤爲平秀吉所滅已十餘年而我國不知也康光  
初到東萊府使享之酒行康光輒落盃破之公與大  
樸耳語曰彼雖求和實欲破盟也及到尙州牧使宋  
應洞以妓樂享之旣出問其何言應洞曰康光言老  
夫積年干戈鬚髮種種而使君處聲妓中何若是皓

白云公謂大樸曰彼言諷我也托以聘好覘我虛實  
矣己丑春倭使玄蘇等又來請通信使公曰倭欲試  
我兵力比年來寇每歲求和而廟堂尙不知備國事  
可知自是遍遊三南察人情相地勢至十二月持斧  
伏闕上疏語多激切不避權貴且言趙憲預知汝立  
必叛可謂先見而尙在遠謫 上特命放還趙公歸  
到吉州又抗章極言時宰之誤國公兄山龍亦上疏  
言事時人皆斥以狂妄庚寅春我使黃允吉等以回  
答使赴日本辛卯與彼使玄蘇等偕來而倭書極兇  
悖公聞之撫劍長歌而已及翼年壬辰倭大舉入寇

聲言五十萬四月十三日渡海連陷釜山東萊於是嶺南一路望風奔潰無敢嬰其鋒者公聞變自三鄉里杖劍來博山故居與兄山龍弟山軸痛哭失聲入告母夫人曰國危如此子等將死於王事夫人曰吾家世受國恩救國而死得其所矣若等其努力公哭謂兄弟曰先君子十年前每說南憂勉我曹以報國言猶在耳其何敢忘遂區畫舉義之策馳往同州前府使金公千鎰家誓與共濟艱危倡募鄉兵經辦糧餉傳檄列邑旬日之間得精兵數百旣而聞李鎰敗申砒死賊長驅逼京城 車駕播遷公日夜痛哭治

兵益急本道監司李洸領七萬兵到錦江聞都城失守蒼黃罷兵人心洶洶公憤惋甚欲與金公馳檄聲罪問罷兵之由時高苔軒敬命與二子從厚因厚亦起義於光州移書金公曰巡察不勤王誠有罪然擅自處置恐傷事體遂止與金公議曰國事至此勤王不可少緩期會義兵卽推金公爲盟主金公慷慨登壇以公爲副將公兄山龍爲運糧將以其子象乾爲從事傳檄道內應者坌集兵威大振以六月出師於羅州留弟山軸曰老母在堂汝則歸養募聚義穀資助餉師遂酌酒相別修書告訣於母是月三路兵潰

於龍仁兩湖益無固志而倚諸義兵爲重先是與高公約日同赴行在高公行收兵在後公與金公直向北路金公雅知公習於兵軍中事悉以委公公號令明肅與士卒同甘苦一軍感戴由是隊伍之整紀律之嚴爲諸義旅最是時賊陳四布勢甚鷓張列闔畏縮鼠竄無敢出兵抗賊者官軍及義兵唯各守州縣而已朝廷命令不通於南方不知君父所在公慷慨將奔問謂金公曰江都南北要衝水陸關防恐爲賊窟宜急先據守朝命可通國脈可保但孤軍深入無以獨立宜遣智畧士募湖西義兵沮遏賊鋒與兩

南緩急相救則聲勢可以相倚矣金公從之遂由木道沿海移陣江華公卽齋蠟書徒步晝伏夜行七日始抵龍灣宣廟聞之大喜卽召入山濤伏地痛哭前奏賊勢及諸臣起義事甚悉上爲之流涕曰久不聞南方消息今見汝始知舊疆之猶保矣公泣對曰臣以白面書生但思一死報國至於成敗利鈍一聽於天矣因書進興復之策上慰獎備至特除工曹佐郎卽拜千鎰倡義使高敬命招討使授以教書其畧曰龍灣一隅天步艱難地維已盡予將何歸人情已窮理宜思復秋涼乍動邊地早寒瞻彼長江亦

瑋集 卷二十六  
流于東思歸一念如水滔滔又授高敬命以恢復教  
旨使節制列邑收復都城以御手親賜藥物于山  
璿掌中諭曰歸語金千鎰高敬命爾等及時恢復俾  
見予有日也公承命揮涕拜稽以退朝臣多勸留同  
仕者公固辭感而賦詩曰千里剗肝謁紫宸密承酬  
醉玉音頻殊恩到骨終何補一死方知報主辰蓋  
以死自矢也還到江都陳列兵馬宣讀教書將士莫  
不揮涕効死又飛傳教旨于高公高公與其子因厚  
已死于錦山之役矣公歸自龍灣三南州郡始知  
車駕所駐由是漕運達于行朝使命通于下道人心

倚之如長城先是朝廷遣使求救於天朝癸巳正月  
天將李如松等帥師渡遼大破賊於平壤城乘勝收  
復三京未幾天將與賊連和諸賊退下嶺南設柵分  
屯於沿海公與倡義使竭力追躡至咸安覘賊進退  
時官軍義兵皆集於咸安等地而鄭松江澈爲體察  
使公曰鄭公雖有清名雅操而不知兵甚可憂也清  
正嘗不利於晉州恚甚必欲一雪請于秀吉先攻晉  
州因擊湖南六月十四日合諸會兵數十萬自東萊  
直向晉州劉摠兵綖時在大丘移書清正喻以利害  
不聽沈遊擊惟敬方留平行長所力說勸挽之行長



曰今日之舉清正主之吾不預焉開說百端無益不如先自空城以快其心也倡義使聞之謂諸將曰賊謀難測奚信只攻晉州之言乎况晉密邇湖南互爲唇齒晉若不守禍必及湖宜并力堅守諸將守令多不應巡邊使李蕢紅衣將郭再祐自丹城徑入山郡左義兵將任啓英自泗川直還湖南全羅兵使宣居怡助防將洪秀男亦皆避去公謂倡義使曰棄城資賊非義也且賊若得志於晉州必長驅湖南今禦賊不於籬外而縱之入如狂瀾之決不可防也莫如固守以遏其鋒然強弱不敵衆寡懸殊我無制勝之策

而只自赴難譬如抱薪而救火請熟慮之倡義使曰計將安出公曰求救於天兵以爲外援然後我軍堅壁以禦表裏夾攻庶可濟事金公然其計而事已急遂向晉州慶尙兵使崔慶會忠清兵使黃進巨濟縣令金浚民海美縣監鄭名世泗川縣監張潤復讐將高從厚副將吳宥義兵將李繼璉閔汝雲姜希輔等各領兵來赴金海府使李宗仁先已入守公以疾在後翌日倍道馳進人謂公曰賊必欲得城何乃輕身赴危地公不聽馳入城倡義使卽遣公及洪涵等乞師於劉摠兵綖公辭氣慷慨言淚俱發綖改容嗟嘆

猶不肯出兵公憤恨而還入晉境賊已逼城洪涵等棄走公泣曰臨危苟免使主將獨陷死地可乎單騎馳進賊兵環圍城不可入乃自南江游泗以達岸一軍皆驚公之未歸奮義將姜希悅亦馳來敵愾副將李潛領兵來會嬰城方畧已定公與諸將戮力扞禦二十一日賊繞城三匝城中按兵不動賊乃退翼日又進薄城飛丸終日如雨城中力拒是夜賊自東門大喊登城黃進等奮身血戰時牧使徐禮元顛倒失措公言於倡義使以張潤攝州事兵氣稍振會天大雨城一隅壞公仰天歎曰謀事在人成事在天俄而

賊大喊闌入金浚民力戰死之二十七日姜希輔死之又翌日黃進張潤等相繼中丸死公哭之慟如悲親戚將士由是感激皆願效死是日城東隅又大崩賊蟻附以入李宗仁持短兵搏戰賊又從西北門揮劍踴躍以前徐禮元望見先走諸軍遂大潰勢若土崩諸將知事無可爲皆登蠡石樓公與金象乾共扶倡義使北向再拜將赴南江公素慣於泗水金公曰君可以免努力更圖滅此仇賊諸義將亦皆勸公出公泣曰旣與同事何忍獨生遂先投江以沒時年三十三倡義使金公其子象乾高公從厚幕下吳玘金

麟渾高敬元兵使崔公慶會幕下文弘獻一時赴江死姜希悅吳宥李潛等十餘人奮劔斫賊抵死乃已李宗仁轉鬪至南江左右挾賊投水死公兄山龍以運糧出湖南聞城陷馳來恨不得同死號哭上下求屍不得招魂於江上而返晉人莫不流涕以是年八月葬衣冠於羅州之北松川公墓下事聞與倡義使並膾享于晉州之彰烈祠羅州之旌烈祠崇禎四年贈左承旨旌其門配淑夫人光山李氏教授義貞女公歿親檢喪祭哭哀有節未嘗有怨恨之色及丁酉再難公兄弟奉母全家避賊于三鄉浦船未出洋賊

船猝至母夫人知不免急呼二子曰義不可辱聳身赴海一家遑遑拯救夫人怒曰吾計決矣竟投于海二子共扶母入水生員公配柳氏妹進士金光運妻族女金斗南妻生員庶女縣令林懽妾同日赴水死夫人李氏與公弟配高氏共投海爲婢所援出夫人索刀佩之曰吾不卽死者以姑及兄弟姊妹皆入于海將俟潮退收諸屍賊若迫當自裁也匿于浦前山賊望見之直前而來夫人拔刀自刎賊嗟嘆而去高氏並收諸屍夫人刀猶在頸公之木主在其背人益悲之曰李氏事尤難後祔葬于公亦旌其閭公之後

遂絕哀哉嗚呼壬辰之難忠臣烈士視死如歸可見  
國朝培養之厚也若夫晉州之役其節尤卓然而其  
功有不可誣者蓋賊以憤兵雖快逞於一戰而精甲  
銳卒盡挫於堅城之下故遂不能轉擣湖南正猶唐  
之睢陽蔽遮江淮之力也如公則逆賭亂兆終以身  
殉一似趙文烈何其偉哉李相國恒福嘗論當時倡  
義之人曰從容就義者金千鎰梁山濤而已若山濤  
則一布衣也可死可以無死城陷之日千鎰勸其出  
城更圖山濤奮曰義不可獨生先投江以死非素操  
之確能如是乎斯可謂知公也銘曰

粵歲壬辰時維百六炎海噴浪長鯨厲齧三京土崩  
列闔褫魄乘輿遠播國步西蹙毒丸利劔我魚我肉  
一个布衣叫天大哭裂裳奮挺灑血飛檄義聲一倡  
士氣咸激名儒尸盟謀夫獻策屹然南方有民有國  
方岳失律投戈河曲賊勢跳梁人心蕩析有誰奔問  
手扶國脉眄彼江都橫遮水陸孤軍擊楫滄海一蹕  
蠟紙在懷宵征晝伏衛士飛奏行殿曉闢嗟我南土  
聲息杳邈豺虎滿野尙保疆域一隅錦城有臣山濤  
不聞其名今繭其足義旅蜂起 祖宗遺澤授官賜  
藥勉爾興復倡義招討金高是勗拜辭還鎮陳兵宣

讀三軍揮血誓心殫力天兵東下千里捲席殘甲南  
遁困獸思毒業業晉陽湖嶺之脊昔彼將噬如喉有  
腊其衆大萬剗山夷壑賀蘭坐視睢陽其亟壯士力  
盡兇鋒肉薄胡天霪雨孤堞中圻前臨大江有樓蠹  
石男兒死耳我所爰得西望報 君奮身先擲羣忠  
駢命天日變色闔門填海抗義不辱比古顏卞千載  
並焯公骨浮水蛟龍不食公衣埋地光氣上燭名兮  
不滅何石之斲雙祠並峙鎮我南服

司憲府大司憲贈吏曹判書忠正李公神道碑

并序

嗚呼國家不幸乃有壬午五月之事當是時天日晦  
蒙一國鼎沸大臣近臣面無人色不敢出一言惟一  
个臣奮然挺身碎首血涕力不能回天而 上亦燭  
其忠釋不誅於是國人咸曰朝廷有臣焉卽都承旨  
李公彝章其人也公字君則韓山大姓高麗忠臣牧  
隱先生穉之後也會祖諱海昌少亢直斥鄭仁弘被  
儒罰旣立朝守正不阿官止中書舍人祖諱晚益讀  
書求志號梅鶴堂考諱必重文學重於世登第未幾  
以說書早卒妣南原尹氏觀察使攀之女公以 肅  
廟戊子七月戊戌降是夕世父教官公夢異鳥止于

產屋形備五章鳴中金玉旣生錫小名曰瑞鳳英悟絕倫六歲而孤好學不怠十六聘于良齋崔相公之門公器之曰海底沉石也二十二中司馬試公志不在於小成博觀羣書以至星文數法琴操通知大畧而不屑屑於科業以親老而貧黽勉就舉 英廟乙卯擢增廣文科隸槐院丙辰除連原察訪己未拜說書陞正言遷兵曹郎秋以御史廉察湖南翌年夏復命選知製教冬出爲平康縣監壬戌秋以持平召移吏曹郎癸亥遭尹夫人喪服畢拜正言丙寅遷司書秋掌試公洪左道冬入瀛館自是選久任不離玉署

居春坊者十而兼帶者八歷薇垣栢府或兼右翊善學教授戊辰以書狀官赴燕兼司僕寺正己巳奉命廉南陽等邑庚午除北評事翌年春仍爲監賑御史秋復命擢同副承旨十入喉院壬申夏拜大司諫癸酉除長湍府使赴任一月特移東萊府使其冬陞拜慶尙監司乙亥還朝周流諫長兵曹參議丁丑夏以叅覈使赴瀋陽冬以按覈使往安州戊寅拜承旨上親寫 仁元王后練主以禮房陞資轉都承旨夏遷刑曹叅判副摠管己卯夏拜大司成秋薦拜咸鏡監司辛巳秋內移大司憲兼同知經筵義禁府事差

備局堂上壬午冬又以安集使巡嶺南歸拜都憲判  
決事此公官歷也凡於域內疆外事有難劇簡遣剛  
能者輒屬於公數年之間無一日閒也嘗以親鞠  
問事郎侍帳殿累月周旋敏給始受上知將罷特  
留公命宣諭湖南仍暗行列邑曰自在堂后知其入  
依李宗城以弘文正字廉嶺南故事也在平康時丁  
大饑單心調賑御史金尙迪歸奏曰李彝章治績賑  
政爲一道之最而侍從分憂乃其職也監司欲首褒  
臣止之曰此人非百里才以此請賞非禮待之道  
上稱善曰御史道臣俱得體矣丁卯以校理入侍陳

講學爲治本無二致上曰今時之難儒臣豈不知  
耶對曰時者人君之所造惟當挽回而已上曰予  
之心氣亦已耗矣對曰心者活物也生生不已氣有  
耗而心無耗矣時上喜著述公奏曰著述者古之  
賢而不得位者欲立言以明道也殿下所處之位  
當陶鎔世道利澤在生民德業在史官謨訓垂之萬  
世此乃殿下文章也何必勞心於著述哉上歛  
容嘉納焉戊辰赴燕時有大國人謂通官曰三大人  
耳白於面聲大於體坐高於立真貴人也庚午秋  
莊獻世子旣代理將講書經特舉公名使備講官

大朝聞而嘉悅曰李彝章非直善講其人剛且簡冲子能知之可貴也是歲關北大饑公以副應教爲評事遍巡關北十州狀陳民情請穀狀到政院夜已深世子秉燭而讀惻然驚憂至及於大臣疏批承旨入侍 大朝盛陳 東宮憂民之德因奏曰其狀辭有甚於流民圖矣 上命持入讀之愍然含涕加劃嶺南關東穀二萬石給兵船督運因命公監賑公又疏請農糧牛菽二萬石特許之關北飢口二十五萬賴以復蘇相與立石而頌之臨歸徐文清志修宰富寧送之以詩曰薄糶排分如宰肉疲氓懷保若烹鮮及

歸 上召見曰活我北民予病臥床具冠見汝卽獻圖王拜受之意也癸酉春守湍府未幾東萊府使馳奏倭人點退我禮單蓼四十餘斤 上震怒並竄辛未後府使問此時萊伯誰可代者左相李天輔舉公名 上曰無此人右遂特許之公旣赴任曉諭曰汝輩進上禮也朝廷所賜亦禮也以下獻上元無點退之舉則况自上贈下者乎是無禮也我國不貴財貨而惟禮法是重爾若不悔過服罪是真無敬朝廷之心也倭人遂折服盡受所退蓼 上聞而褒獎曰非此人無以鎮服狡倭李相天輔曰從容彈壓使彼自



服真方伯之才也知申事李喆輔曰貌雖短小而有  
膽有識頃年監北賑時措處極有條理臣爲方伯只  
拱手責成矣居無何嶺伯缺 上特授公曰是倭人  
所畏也公莅藩持重而寬裕明核而安靜殿最黜陟  
不吐不茹一路肅然及解藩歸 上召見曰不見卿  
三年矣能鎮邊民布國威予甚嘉之萊事必有可言  
者對曰蠻夷上畏國威臣何力焉但接馭之道當用  
七分恩三分威也然馬州卽我外藩一小島也其島  
主與機張縣監釜山僉使抗禮故臣待罪萊府時凡  
責諭之政一併自當或稱朝廷大臣之意不敢舉

聖旨二字矣言未畢 上曰善哉是能尊朝廷也其  
爲叅覈使赴灣也彼推官先到而怒我使之不會朝  
廷聞之促命公星夜馳至盤覈有緒使事無梗旣還  
上勞之曰使乎四方不辱命矣初爲北評事也見開  
市時彼之誅求無藝我之贈遺日增遂至於斂民初  
年出六千包者今至累巨萬會鍾穩源之民盡散而  
之四公請移咨變通諸宰中洪公鳳漢力主奏聞之  
議而 上始難之後暗行御史鄭晚淳歸奏北民難  
支之狀 上大驚動罪道臣帥臣而命公往按北藩  
使以便宜從事公到任歎曰此邊民大命也苟求百

年無事非拔本塞源不可乃決意罷邑贈指陳利害馳狀以聞曰所謂邑贈不在約條乃私贈也人臣本無疆外之交名不正當革也 上覽狀拍案曰是矣依狀許施公遂撰進定例相臣金致仁奏曰盛水不漏可行之久遠矣洪鳳漢曰開市變通後累經雙市一遵定例自己卯減民斂者十之九誠北民大惠也請入之梓永作關石之典 上可之公賦政于外勤勞王事上以尊朝廷下以安邊民其功茂矣在公猶屬疏節其立乎本朝抑有大者焉當國家至艱之會周旋 兩朝之間正色昌言至誠匡救誓心一死丹

衷炳然足以明人紀而樹臣節嗚呼偉哉丙子夏樂善堂災 上責教有及於 春宮曰近事無人告予朝臣無可恃矣賊臣尚魯對曰小天亦可畏故也公進曰 小朝過失輒告 殿下世豈有如此道理乎若入 大朝則陳 東宮美事對 東宮則從容陳戒此人臣處 大小朝之道也 上曰承旨言是矣公仍奏曰父子之間有過失諫之責之固也而聖人所謂父爲子隱子爲父隱者無令外人知之不至暴著是之謂隱今朝 辭教實有違於聖人之訓矣上爲之感悟曰所達出於至誠矣壬午之夏爲同知

義禁凶賊羅景彥投凶書 上不問而遽酌處公進  
曰凶書臣雖未得聞而見其狀草則中官掖隸盡驅  
之惡逆而盤問時旣不能指其人又不能告其謀是  
其言誣妄而其心不可測也宜嚴問得情斷以誣告  
之律 上是之旣準刑更入侍奏曰俄臣所陳只就  
其狀辭而議其罪聞今其所供誣逼不敢言之地必  
欲上達此大逆也朝臣規諫之言雖達於 東宮猶  
恐或聞於 殿下矣言未卒 上厲聲曰卿亦欲蒙  
蔽我耶速退已而 上心悟卽命誅景彥至閏五月  
十三日公病在家特拜都承旨承牌詣闕忽聞螺角

聲起闕門公大驚倉黃馳進則 上御徽寧殿月臺  
東宮伏于庭自午至酉 嚴教震疊公免冠叩頭涕  
泣奏曰 殿下何忍爲如此舉耶將奈 宗社何獨  
不念 三宗血脉之托乎疾聲而爭不已 上命出  
施軍律公迸出待命聞內庭哭聲甚急是宮官也公  
冒死突入痛哭大呼曰 殿下此何事也 上曰承  
宣不知內間事耶公對曰兩闕之間蟻蝨輩往來之  
言何足信乎宮僚潛請公調進丸劑公出招首醫方  
泰輿取清心元來泰輿頗難之公叱曰身爲首醫焉  
敢持難罪則吾自當矣遂調藥以進 上震怒召宣

傳官出斬泰輿公叩頭曰臣使之進非醫罪也請誅臣者再 上還召宣傳官只斬泰輿之髻仍命禁軍驅出宮僚倉黃中 東宮亦隨出 上復命禁軍召入公進曰召 世子不可使禁軍問誰當使對曰承旨可 上曰卿往公未出門 東宮已還內矣當公之初入也 上命別軍職背負 世孫往慶熙宮公奏曰 世孫當詣 內殿膝下受慰撫若負人背民情必驚動矣無已則宜畧備儀也 上是之命以小輿往 上初御正殿時命進承旨草紙注書餼硯親寫一紙藏御袖及大臣入侍出示之而授公開視乃

廢儲傳旨也公急還置 御座前退立時有言可使承旨書者 上命公抽筆公叩頭泣曰臣不忍書此教請伏方命之誅命上草紙公即趨出胥命于金吾門蓋軍律之教未還收故也是後事不敢道嗚呼痛矣後公於賓廳謂諸宰曰大臣可爭者有三事位號當即復也治喪當無憾也議諡當求美稱也方今宗社大計莫急於慰安 世孫之心矣頒教曰 上謂筵臣曰李彝章則是矣如此之時當有此等臣也公差 墓所堂上方董事獻納李興宗啓請拔經筵望 上不允曰此人才識豈在人後興宗者即禧賊

從妹子也經筵通望有年而今乃如是者意蓋在逞憾也自此一種之徒相續而起大司諫宋瑩中發啓言三銓徐命膺不避姻嫌而叅政擬望掌令金養心繼言之 上並嚴責而罷斥之左相洪鳳漢進曰如李彝章者何可塞經筵望乎公自是不安於朝其冬嶺南大饑奉命安集流民甲申十一月十九日一疾不起享年五十七 上下傷悼之教摺紳韋布奔走相吊雖不悅者莫不變色嗟惜後數年當萊伯擬薦上謂相臣曰南接倭北接胡安得如李某者乎癸巳夏 上追念之令銓曹官其子嗚呼公自在經幄受

深知於 聖主歷試內外無不稱旨中經事變眷遇不替可謂知臣莫如君而公之赤心事君有以上格也公體不及中人而儀貌昂藏精彩曄如望之而不可狎近之而可親識慮透明見人所不及知力量宏深斷人所不敢爲姿質則金精而玉溫動止則規圓而矩方此其德性也事親盡其忠養尹夫人嘗邁時疾一夕昏室公泣禱曰請假我十年因血指灌之得蘇後癸亥夫人棄世去禱天之日適符十年人皆異之事伯氏如嚴父與妹氏絕甘分少賴以舉火聚藩邑例給祭馱置田而立憲名之曰追遠庫十世祧墓

皆歲一祭之此其內行也謙以自牧廉以居官文辭  
瞻博乃其餘事而况先立其大者精忠貫金石聲名  
垂後世他皆可畧也良浩後進也少慕公節行之高  
出處言議多視公爲準公亦不我鄙待之以少友當  
壬午之歲適官嶺外聞變而解歸嘗與公相遇於  
闕宮齋所握手說當時事悲咽不能言曰吾輩不能  
從死無面目見人昔年吾嘗勸梧川相爲 春宮一  
死吾尙苟活有負翟黑子矣至今歷歷如昨日事公  
之沒居然三十星霜雷肆舊僚殆無餘者白首獨存  
未嘗不中夜掩抑公之嗣子恒演疏公事行來屬不

佞曰今世知先君心者惟公而已乞有以闡發而垂  
諸後余何忍辭而每操管欲寫某年事心折眼眩歛  
紙而太息者屢矣今朝暮且死將無以歸見於地下  
遂揮涕而敘之悲夫今 上丁未左相李在協奏曰  
故叅判李彛章文學才猷見推一世而未及大用  
先大王屢發嗟惜之教况其樹立卓然無愧古人而  
林德躋則贈職贈諡此人獨未表章請追贈正卿因  
賜節惠之典 上亟可之遂贈吏曹判書兼大提學  
翌年李相又奏曰李某贈諡有成命而狀辭有鄭重  
難言者尙未撰成云矣 上命不待狀於是太常議

進曰忠正羣情咸允夫人海州崔氏別檢尚謙女忠貞公奎瑞孫也溫恭慈惠拙於言而敏於行良齋嘗稱之曰女尚書舉一男五女男未育取從兄彝采子恒演為嗣今牧使長女適趙榮素次判書徐浩修次鄭楞俞漢訥鄭文淳恒演一男東升女歸鄭東采朴宗倫趙榮素三女歸縣監崔吉憲校理朴鍾淳尹行鎮徐浩修四男二女男有本進士有渠待教有樂有棐女鄭最愚尹郁烈鄭楞一女歸洪胄淵俞漢訥無育鄭文淳繼子東采銘曰  
大君惟天 貳君亦君知臣者天愛 君者臣赫日

下臨震雷無聞臣腕可斷 王舌可捫腔血沸騰斗  
膽輪困蓋臣匪躬烈士忘元義無兩全志不獨伸邦  
之艱危誰極誰因呼吸存亡願百其身生報 明主  
死獻 仙園嶽嶽正氣上薄玄雲片石不言百世長  
尊

左議政李公神道碑 并序

公姓李諱性源字善之始祖茂以唐中郎將從蘇烈  
平百濟留仕新羅封延安伯遂為延安人入我朝有  
諱石亨魁三場官至判中樞策勲延城府院君諡文  
康號樗軒四傳而至諱廷龜左議政諡文忠號月沙

子諱明漢吏曹判書文靖公號白洲兩世典文衡文章德望冠冕一代於公爲五六世也高祖諱萬相成均進士贈吏曹判書會祖諱鳳朝沃川郡守贈左贊成祖諱正臣戶曹叅判贈領議政考諱吉輔工曹判書贈領議政妣贈貞敬夫人豐壤趙氏判書錫命女繼妣贈貞敬夫人光山金氏學生德升女生考諱得輔 靖陵叅奉賢而蚤世贈吏曹判書前妣贈貞夫人溫陽鄭氏直長壽崙女生妣贈貞夫人全州柳氏學生震虎女以 英宗乙巳生公三歲並失怙恃判書公取以子之撫養教誨得以成長骨相殊異嘗隨

趙夫人造外宅豐原趙相國見而奇之撫其頂曰此兒當坐吾席才性絕人學語便解文字五歲詠雨曰山黑風驅雨高木落萬鈴稍長以詞賦鳴泮庠聲名屈輩流嘗一歲四發解而屢不利於禮闈甲戌始中增廣生員丙子筮仕義禁府都事歷禮賓寺司宰監奉事 社稷宗簿寺直長己卯陞司圃署別提 仁元王后祔廟差都監郎廳移司憲府監察除新昌縣監辭時相語及廩薄公瞪視不答時相憮然語人曰吾乃今知待士之道翌年病遞公雖潦倒末蔭而昂然有當世志素嫺功令每赴場屋立草成章及壬午



魁柑製癸未中增廣乙科除兵曹正郎甫數日選入  
瀛錄拜弘文館校理差推鞠問事郎移修撰司書兼  
東學教授公出入經幄侃然正色有懷必陳多所獻  
替甲申春以館直不備八玉堂並謫甲山公亦與焉  
到配卽宥歸爲兼文學司憲府持平以御史往按忠  
州逋穀秋除嶺南左道京試官乙酉秋差豐德御史  
刷還流民冬又承命往覈楊根殺獄兩歲三膺直指  
之命皆稱旨丙戌春魁重試例陞通政拜兵曹叅知  
叅議旋移右副承旨序陞至右除大司諫冬薦爲廣  
州府尹地大吏橫素稱難理公莅以嚴明闔境肅然

戊子遞拜承旨自是數年乍遞旋授長在喉司間爲  
大司諫刑禮曹叅議庚寅冬擬大司成辛卯春通三  
銓甲午出爲淮陽府使公文學政事靡適不宜受知  
英考恒置近密晉塗方闕于時戚里用事世皆靡然  
而公獨剛介不與俯仰長孺之出淮陽非爲得重也  
公夷然無幾微色爲治與民相忘暇則與賓友子姪  
佚宕於三日萬瀑之間詩酒琴棋不問時事其後屢  
建節旄歷躋槐棘而端居輒思淮陽如歐陽之夷陵  
焉丙申 聖上御極峻良彙征除黃海道觀察使先  
以方面試也時公聰明智慮益練時務慨然以澄清

王溪集 卷二十六  
彈壓爲已任仰報簡拔之隆知所部多大吏而望風  
憚懾無敢爲不法事深達治體嚴而不苛尤善於啓  
牘指陳如面奏 上每加獎諭無請不施會值北使  
之來先期整飭供億無缺一路晏然丁酉移拜慶尙  
道觀察使嶠南北海西幅員尤大事務益殷而公治  
之如小邑每朝衙掾吏抱牘左右進口呼手判數刻  
而罷裘帶嘯咏自如也臨歸捐廩數萬包散列邑預  
備賑資是歲大饑民賴無瘠戊戌秋陞嘉善入爲大  
司諫旋除同知中樞兵曹叅判又移刑曹一日 上  
下獄案數百度命三日內覆啓公一覽草成翌朝修

上鉤深蔽疑無一出入 上亟稱斷獄之才及陞正  
卿歷長五曹而居司寇最多然每決一案必兢兢致  
慎曰人之死生係吾一筆聰明不可恃也差 英廟  
實錄堂上己亥除都承旨轉漢城右尹出爲江華留  
守庚子春以大司憲召還旋除成均館大司成秋擢  
拜資憲大夫漢城判尹移刑曹判書冬拜兵曹判書  
行大政辛丑春校理洪文泳疏論政注試院事公引  
義遞除議政府右叅贊刑判又拜兵判屢違召特罷  
仍秋曹旋移本兵飭諭諄複行大政而至臘政又行  
之因事罷壬寅春公子崑秀以庠生入侍盛被寵褒

特敘公爲刑判又拜兵判遞移吏曹判書尋授戶曹判書陞正憲癸卯春薦拜平安道觀察使公屢典重藩不以位高寵隆少弛治道甲辰春入爲兵判丁金夫人憂丙午制畢除知敦寧移工曹判書差 文孝世子魂宮都監提調又除兵判承命書 孝昌墓表石蒙錫馬之典差吊勅館伴使若其前後兼帶則於經筵春秋爲同知知事於館閣爲弘藝文奎章閣提學而入文衡薦同知成均館義禁府事都摠府副都摠管備局承文提調於籌司常帶有司之任又提舉于內醫尙衣司饗司譯院奉常司僕寺典醫繕工監

宣惠廳諸司也尋爲開城留守丁未秋移拜咸鏡道觀察使九月哭子翰林 上下綸慰諭愍其情理解其職除右叅贊歸住蘆原楸舍疏陳悲苦之情 上賜批勉出戊申春枚卜拜議政府右議政初疏批曰卿父子久處邇密朝夕左右呼吸直通所謂家人視者求卿之心卽剛方周詳四字公耳國耳別嫌明微今日彌綸之策捨卿誰先尋陞左議政連上三疏批旨隆渥屢遣史官承旨敦勉公乃出膺登筵極論禍及國榮夏材等諸逾源委力請懲討夏特除禁衛都提調冬兼司譯院己酉春 宣禧宮改號時論罷

內閣提學金鍾秀之不叅議坐大致觸忤公亦不顧也兼內醫院都提調憲臣鄭澤孚疏論完伯薦事陳疏出郊 下批斥言者連遣史官敦勉不獲已入城未幾呈長單凡四十二度屢 批不許尋解禁營移兼御營差冬至謝恩使將出疆解相職付判中樞冬發燕行歸道疾作遣史官迎問柵外命兩西道臣致藥物行到近畿病篤不能復命舁還京第考終實庚戌四月一日也 上聞而震悼遣承旨致吊閣臣致祭又 親綴文賜祭曰忍忘賢哥欲觀難更卿又逝止無奈乎命孰作席珍孰替人鏡後對筵臣 下教

嗟惜曰有器局可當一面如故相者何處得來以是年六月七日葬楊州蘆原甲坐岡配貞敬夫人高靈申氏領議政翼相之後進士濩女一男崑秀有希世奇才妙年登內閣官止翰林無子取從子洛秀之子若愚爲後二女長適進士金寅鎮次適進士鄭東潞公廣穎秀幹眼彩燁然精神氣量常兼數人持身簡嚴平居寡言笑處事皆有尺度居家孝友事判書公暨兩夫人愛敬俱至及後喪公方衰齡號擗若不支伯氏叅判公年長數歲事之如嚴父及喪四日哭不絕聲與從氏議政公隔溪而居動靜語默未嘗或違

其立朝也愛民憂國發於至誠朝廷有事毅然直前  
衆論盈廷一言可以折衷始以文學進晚以經濟用  
文權武柄貨府理官一時並縮可謂需世之通才一  
代之峻望自在 英考官已顯矣逮我 聖上用以  
不次試之也遍任之也專公乃展其抱負翰林君繼  
又登朝視遇如家人倚毗如柱石公之遭逢誠千載  
而一有公亦乃心王室夷險向前嚴忠逆之分則義  
形於色念休戚之同則國耳忘身一自翰林之喪遂  
無意於世金甌既卜 聖眷益隆而公之神明志氣  
非復昔日三歲中書多在臥閣萬里銜命竟未返面

嗚呼悲夫不佞與公立朝差先後同周旋數十年文  
學風裁心常敬服方公枋用余則棲棲于外及余廁  
跡于朝而公又不待追念平日相與之義未嘗不愀  
然永懷今公之從子韓山君持直學君所爲狀來示  
余求牲石之刻顧余精耗筆短無以鋪張名德而義  
有不敢辭者謹就狀文而節約之系之以銘詩曰  
延城之闕基自文康有斐月沙堂構大昌白洲嗣興  
奕世文章公以門子爲時嘉祥材比棟樑望齊珪璋  
再題黃甲早歲翱翔常處近密敷納明詳三膺直指  
不吐強梁獨立周行物無低昂縱觀蓬丘薄臥淮陽

驥步大展雲衢高驤海西嶠南旌節煌煌箕城朔方  
鎖鑰邊疆入掌兩銓公道恢張李官清平金府盈藏  
周流六部聲績茂彰於焉奮庸晉居巖廊契合之融  
庶古明良胡天不惠奪我賢郎鳳毛凋零猿腸摧傷  
燕山迢遞雨雪雱雱身歸禮闕夢語悲涼精透之識  
履屐皆當堅確之操身家兩忘知臣者 君許以剛  
方穹石有磷英靈不亡

判中樞府事趙公神道碑 并序

國家運撫承平隆亨豫樂搢紳大夫以簪紱爲家計  
爵祿爲世業其能脫然拔乎流俗者蓋絕罕焉今於

判中樞趙公見之矣公諱雲遼字士亨行吏曹判書  
謚靖憲諱榮國之子也靖憲公負重望位上卿公以  
門子生有異質骨相奇偉風儀雋邁趙豐原顯命一  
見許以國器 英廟庚申擢庭試由槐院選翰苑癸  
亥陞司書持平正言甲子入弘文館修撰間爲京畿  
都事移校理時靖憲公帶副學公引義遞自此數年  
不離經幄請褒乙巳名臣鄭希登以勵節義崇用讀  
書之士舉孝廉之人以敦風化 上皆傾聽歷政府  
檢詳吏曹正郎侍講院兼文學中學漢學教授校書  
兼校理乙丑關東有淫獄特命公往按稱旨丙寅遭

內憂時靖憲公赴燕未還公痛哭終身自畫燕路戊辰服畢拜掌令奉常正復入校理時以災異延訪公見大臣臺閣寂無一言陳戒慨然進曰 聖上遇災求助廊廟未聞修省之謨誠寒心臺臣只傳故紙宜斥罷 上從之筵中肅然大臣退而引咎己巳拜掌令司諫移北評事病遞屢除玉堂春坊至應教輔德庚午拜執義司諫時 東宮已代理因虹變上書陳戒言甚剴切除冬至書狀官引義遞辛未歷司僕正兼輔德差尊崇都監都廳三月賞加通政拜右副承旨序陞至右五月冊 王世孫以禮房勞又陞嘉善

階由左承旨移漢城右尹兼都摠府副摠管同知義禁府事秋除都承旨兼藥院提舉十一月 上違豫藥院將移直復常後例有賞資公連告病 上嘉其意命遞公以官太驟爲懼力求外壬申夏出爲楊州牧使旋以公格解秋拜定州牧使寬戶徭革漁箭設社庫爲政一葺惠化大行後以僨使過定民爭挈壺酒以迎擔轎送境內癸酉歸拜刑曹叅判甲戌歷大司諫大司成出爲全羅道觀察使湖南於公有三世遺澤素熟民情吏奸擿伏如神一路震動乙亥春羅州有掛書之變人心煽搖中外繹騷公單車馳往鉤

得罪首動中機宜 上嘉賞之曰聰明才諳豈可久  
勞於外卽許遞納符日召見曰乃今知卿爲國之忠  
錫以文皮九月除吏曹叅判兼同知經筵成均館事  
八月薦拜平安道觀察使甫陛辭有臺臣彈靖憲公  
上燭其猜憾召責言者放之嶺外促公赴任公終不  
起 上勉許之拜戶曹叅判公上䟽痛卞丁丑秋授  
慶尙道觀察使公力辭 上面諭而敦遣之嶺地大  
務劇最號難治公莅之如湖南令嚴政簡優禮經學  
之士興起鄒魯之風戊寅以親病乞解已卯陞資憲  
大夫戶曹判書旋移吏曹皆特簡也公以履盈爲懼

苦辭不膺 上促命入侍公涕泣奏曰父子迭掌銓  
衡人猜鬼譴何以保身家乎 上動容曰言出於誠  
予當遂卿志翌日解其職每當冢宰缺輒稱惜焉夏  
拜刑曹判書特移兵曹兼知春秋館事籌司堂上公  
患瘡 上遣醫看病蓋異數也經大政遞拜漢城判  
尹禮曹判書北使至差館伴使翌年夏因旱理囚特  
除刑曹判書十月遭靖憲公喪旣吉拜右叅贊管籌  
司有司之任尋授戶曹判書謹筭鑰均災政杜防納  
民受其惠國用亦不匱 上稱其能而專任乍移旋  
授周流六卿政府東西壁 世孫賓客癸未冬拜咸



鏡道觀察使屏紛華飭戎備丙戌夏罷歸復入戶曹  
議定親耕親蠶之禮尋移判尹禮曹復授本兵過大  
政屢辭違召出補京畿水軍節度使數月召還戊子  
春超授崇政爲判義禁府事除兵曹旋移度支公牢  
辭 上督命察任翌年春遞越月又特授至辛卯冬  
以 肇慶廟神版造成勞加崇祿壬辰乍適旋除前  
後凡十度近世所未有也以 毓祥宮上諡都監勞  
加輔國階癸巳拜判中樞府事甲午九月二十六日  
卒于玄湖距生年甲子厯一周矣 上聞而悼盡親  
製文致祭十一月葬于燕岐問舟里負卯之岡趙氏

本楊州人領中樞府事末生佐 獻陵有勲德知敦  
寧府事存性師牛溪先生名重士林生諱啓遠刑曹  
判書諡忠靖生諱龜錫全南道觀察使生諱泰東大  
司憲生諱鳳彬贈左贊成繼叔父贈吏曹判書諱泰  
崇之後是爲公大父也公妣清州韓氏判書配夏之  
女配貞敬夫人潘南朴氏正郎師休女錦陵君弼健  
之孫舉二男一女男長宗鉉文科今判書次廷鉉進  
士今府使女適郡守鄭東蓋判書無男以府使子濟  
明爲嗣一女適李集壽府使次男濟晚女適尹善圭  
尹命圭李玄五鄭五男泰容晉容謙容觀容履容公

早承庭訓有大家規範靖憲公喪年已衰位已崇矣  
持制甚謹時節省墓乘樸馬往來三百里地拜伏悲  
號衣裾盡濕宗家貧祭不能備物公每優助膳羞以  
伸追遠之誠厚於親族篤於故舊不以存亡夷險人  
以爲難及立朝則盡悴奉公處世則推誠容物咸稱  
盛世之蓋臣受知 聖主歷試外內位躋公孤三按  
重藩而績庸可傳十掌邦賦而干托不行力避權要  
身名無玷竟爲一代之完人豈不偉哉公以名位貴  
顯盈盛難持早決江湖之志占一區於西湖取淵明  
之辭扁曰日涉亭及戊子歲兩子相繼登大小科卽

捲出湖舍閉門謝世栽花釣魚以自娛時遇朋儕命  
觴彈棊而一言不及時事或因大朝會暫入城闔幅  
巾匹驢一隸隨後人不知爲宰相也良浩後進也竊  
觀公器局風采傑然出羣心常傾仰及至晚節年未  
暮 主眷方隆奉身決退超然高舉又爲之起敬也  
公亦不以余陋嘗邀至江上飲酒道情素歷敘遭逢  
之盛優遊之樂求一言以彰其志乃述亭記揭之壁  
稱其勇退之節居然三十年所矣自顧官盛年至而  
求退未退白首低徊嘗以是愧公今判書列公事行  
屬以麗牲之辭雖余精毫筆退其何忍辭謹敘其大

節而系以銘焉銘曰

易稱戒盈老貴知止錢淡成之急流勇退卓乎不可  
尚已歐陽子之未老歸穎如公庶幾云爾居家敦孝  
睦之行立朝勵忠蓋之義休休其容物之量綽綽其  
處世之智六官之績庸咸茂三路之利澤遐被始也  
平步青雲之衢終焉高臥滄江之沚翼乎如翔鴻之  
遇風沛然若巨鱗之縱水人或比李文饒之平泉我  
則慕仲長統之樂志樽有酒兮床有琴良朋萃兮燕  
喜嗟歲月之不與留以遺夫良嗣山之幽兮石不磨  
誰歟銘者老太史

禮曹判書李公神道碑

并序

公姓李諱崇祐字德而龍仁人也上祖吉卷佐麗太  
祖策勲壁上官太師奕世冠纓有曰士渭入我朝官  
開城留後子曰伯持觀察使選廉吏八傳至士慶大  
司諫生後天刑曹叅議於公爲五代祖也高祖諱峻  
岳禮賓寺正曾祖諱世貞義禁府都事贈吏曹叅議  
祖諱宜揆漢城判官贈吏曹叅判考諱普興德山縣  
監贈吏曹判書妣贈貞夫人安東金氏敦寧府都正  
聖游之女本生考諱普淳戶曹佐郎贈吏曹叅判妣  
贈貞夫人清風金氏執義裁女祖諱宜遂戶曹正郎

寔判官公伯氏也公生於景宗癸卯幼而器度沉厚尹尙書惠教卽從祖舅也見而奇之曰遠器也六歲判書公取而爲子教課甚嚴公聰明好學甫踰十歲博涉經史弱冠已成通儒留心世務英宗癸酉中進士辛巳對策登庭試隸槐院壬午今上陞儲位設春坊首通說書尋入翰苑由檢閱轉待教奉教癸未陞典籍時鳳山郡有疑獄特遣公廉覈故事御史多用三司而公甫陞六膺是簡蓋於周年簪筆受知深也公鉤得其實復命稱旨屢拜正言持平司書文學吏曹郎兵曹軍色郎乙酉春差備局郎檢察嶺

南穀儲一裁以法大吏多抵罪者丙戌丁生妣憂戊子服畢屢除兩司春坊庚寅秋差洪忠都事掌試事近歲湖右試闈多闕主試者輒以吏校擁護公悉屏之緩轡以入母敢譁者旣出榜士稱其公明是冬選入瀛館以修撰登講筵敷陳明剴上稱善司諫李迪輔受人嗾論新錄八人並及於公上嚴斥之刊其職公陳疏引義上謂筵臣曰素知李某文識方喜經幄得人甚可惜也自是屢拜修撰校理皆不就惟春坊則勉膺之壬辰復以館職違召會上心有激編配大興郡月餘宥還未幾除京畿都事癸巳移

弼善歷司僕寺正通禮執義司諫甲午又遷輔德乙未春特除承政院同副承旨轉右承旨兵曹叅知叅議是冬拜春川府使丙申 英宗上賓本道進香之需例出民歛公曰進香煩民豈體 大行意哉遂官自辦進不半歲邑大治逾臣金夏材爲監司挾私憾乃置之中考 上燭其狀曰此人豈不能爲春川耶屢下責諭尋因事削其職丁酉除刑曹叅議屢拜承旨戊戌除安邊府使治以興利除害爲先防諸社藏冰之價蠲兩津供魚之稅間值歉歲捐廩賙濟闔境無瘠民鑄鐵碑以頌之庚子以冬至副使召還會以

使名兼謝恩當遣亞卿相臣白公沉屈請陞秩以仍之 上遂擢授嘉善階俄拜大司諫抗疏言亂逾層生義理不明將如橫流之不可遏請察影見形防微杜漸言甚激切 上優批嘉獎曰卿可謂不負冑筵所知矣尋移拜戶曹叅判冬行到龍灣長子在學適尹是府備儀迎覲一路聳觀公以盈盛爲戒杯盤絲管切禁其張大在途約已檢下留燕不近雜戲不喜遊賞盤纏有剩悉分之譯員郵卒歸裝蕭然燕人爲之歎服翌年春返朝除漢城右尹尋拜洪忠監司本道多豪右獄訟甚繁公制之以簡鎮之以靜凡所施

措鑿鑿無罅漏雖錢穀之繁斲者瞭然如燭照老吏  
猾胥不敢絲毫欺分俸金以蘇驛戶儲城穀以繕戎  
器購書於學宮而多士勸給財於里社而力役蠲至  
今遵而賴焉時湖儒有護逆者事發承命覈治而株  
連漸蔓公與按覈使會查詳審平允惟恐一人枉罹  
雖異己者莫不心服壬寅因微事遞癸卯以大司憲  
疏言鄭致達妻出陸用密旨大關後弊 批曰法語  
能無從乎予方受而爲咎是時諸臣懲討之章皆例  
批報聞而獨公前後進言輒蒙開納焉是春 上追  
念書筵舊勞下教曰予在東宮畢講綱目適符 兩

朝盛蹟而宮僚中自始講至畢講以至續綱目者惟  
此一人特命進階嘉義甲辰又以都憲疏陳 元良  
蒙養之道曰養德性擇左右節居養戒玩好勤講習  
本身教演爲六箴以進 上優批以答丙午 文孝  
世子在殯以大司諫論衰服用白皮靴之非禮 上  
令禮官博議改用麻屨仍爲定制屢除都承旨禮兵  
刑曹叅判左右尹而於秋曹京兆最久移他職特仍  
者屢蓋以理獄精審也兼帶則同知春秋義禁副摠  
管及五司提調也知申則除旨殆無虛月公子亦頻  
入喉司父子迭處近密一世榮之是冬 王大妃殿

上尊號設都監度支長適在外特命公爲亞堂兼管都監事丁未春禮成用勞陞資憲進拜刑曹禮曹判書漢城判尹兼籌司堂上冬薦拜咸鏡監司時慶興咸興德源有 聖祖舊蹟豎碑建閣累月未竣公至則董成之獎以錫馬公以邊門重鎮積弊滋久條列上聞侍軍食增砲兵禁剩穀防橋役又鳩一歲之俸貿白金三千兩封椿以備不虞俱成節目務在經遠兵民無不被惠焉翌年秋南北關俱大饑公以衰病不堪賑政陳章乞解 上屢勉飭之不得已力疾巡省運嶺穀以濟南關移南穀以哺北民歲前則賙之

以營穀每狀奏輒獎諭曰纖悉詳備不負委寄之責公益感激殫精至廢寢食及春巡疾復作還營時季子登庠來覲置酒接客談笑自如居數日取案上啓草促令淨寫蓋關防邑弊民事三條也親考準手押如常日侍疾者進湯公却之竟以翌日卒于營舍實已酉三月二十三日也享年六十七訃聞 上驚悼下哀綸輟朝吊祭如禮命別庀葬具翌月返柩五月二十二日葬于安山元堂里先塋次丑坐之原鞠歸之日一路士民奔走號呼爭先執紼安邊之民十社男女各致饋奠如哭私親可驗遺澤之深也貞夫人

安東金氏花川君浹之女遼東伯應河五代孫也事尊章極其愛敬育子女必以義方尤兢兢於奉祭祀洗滌烹飪躬執不懈家無礪石入而劬女工以供親廚備嘗艱苦而不形於色判書公嘗稱之曰吾婦必昌吾門及貴身不着文綺食必取淡薄厚於收族樂於施善及遭公喪哀毀成疾竟以同年八月終壽長公一歲葬從公同穴育二男三女男長卽在學今判書次在翼今別檢女歸鄭來鼎僉正鄭夏榮鄭東晚皆進士在學一男奎鉉在翼三男長箕鉉出爲伯氏同樞公孫以尸本宗祀其餘幼鄭來鼎子晉榮鄭夏

榮子孝源女適李孝淵鄭東晚二子二女奎鉉二子皆幼公爲人長身秀貌清癯若不勝衣而沉精簡默精華內蘊操履堅確律已治家皆有尺度篤於孝友少時食貧而親廚必有甘毳晚年奉生妣怡愉如嬰兒事伯氏及姊甚謹推及宗族接遇救恤曲有恩義文學早成功令亦皆精鍊尤長於駢儷而常曰士當以操檢爲本文藝末也手寫經典潛心玩繹及登講筵敷奏明暢大被明主之知每稱經學文詞之兼備廷臣罕比素有精心計處事綜密置水不漏屢典藩邑皆有殊績然守謙務實不欲求知凡公私衆會退



然屏坐言若不出口以故人尠知其所蘊其在外任  
聲色游觀泊然無所好惟單心民事如恐不及事君  
則一出誠悃未嘗自占便宜在 上前端拱植立竟  
晷不移步不游視人皆屬目焉平居恬靜視名利如  
機穽時有權貴用事舉世靡然而獨不識其門人以  
爲難及良浩與公齒相近居相隣自鄉黨至朝端同  
周旋殆四十年每以疋驢造墨里之第破屋荆門草  
樹蒙翳惟有黃菊數盆清香滿室散秩咿唔蕭然若  
塵外人心常愛重中歲以後官益顯祿益厚而不變  
布素之舊始知平日所養者深矣北藩以後 上卷

彌隆行將大用而公遽不復朝野莫不悼惜然壽躋  
耆稀名德無瑕鐘鼓偕樂金貂接武福履之盛當世  
尠比咸稱一代之完人詩云豈弟君子求福不回公  
之謂歟判書君述公事行來請麗牲之刻感念平昔  
揮涕而序之遂系以銘曰

聖人居震夙簡僚屬爰有宿儒久齒講幄光紹 兩  
朝紫陽綱目由是契合屢膺寵擢內長尙書出殿南  
服侃侃補闕翼翼修職捐金蘇驛購書勸學班高卿  
月寄重鎖鑰歲丁大侵飛輓南北身乃告瘁民以無  
瘠朝聞戶歌夕騰巷哭浩然觀化緘奏手墨豈直忠

惻允驗學力行孚于家績茂於國進不藉援居則守約令聞無斃壽考寬樂天惟益謙載受多福有子繩武門闌如昔衍及孫曾維德之食公兮不亡永觀穹石

知中樞府事柳公神道碑

并序

英廟丙子秋耽羅大饑上將發湖南粟以救之良浩以近臣承御史之命乘傳馳下到完山發檄近海數十邑分劃數萬石米因問道內牧守之剛能幹事者咸以長興府使柳公鎮恒對於是辟爲督運官期會于錦城面議籌畫公年方少計事敏而詳綽綽如

宿講者余大喜遂以運事專屬於公時屆風高水冷瀛海險遠列邑胥憚之公躬自檢督剋期裝發無一後者數十浪舶聯帆齊進檣楫不損斗斛無虧回泊於兩月之內島人咸稱前所未有實是王靈攸濟而抑由幹事者之誠力有以致之也遂於歲前復命上亟嘉獎之余於是識公之能可辦大事也歲甲申余出牧洪州公時爲營將居一府同周旋見公莅官簡而廉治盜嚴而不苟不用猛杖而萑葦無警於是又識公爲政有儒將風心焉敬服旣還朝公性狷介未嘗隨衆造請而知契相感無異布素之舊及余按

節關西公之胤子孝源爲寧邊府使旋陞節度使公  
年老謝事就養于營府余於行部之路輒往訪焉置  
酒徵歌驩然道舊故華髮矍容相對有流年之感東  
歸數年公壽躋八耄陞崇秩寬樂令終余獨白首寄  
世未嘗不愀然起想今捕將君列公事行求所以不  
朽公者余何忍辭余官忝太史於國朝忠臣烈士名  
行節義多所撰述至若柳氏之世傳忠烈曾已闡發  
表揚故最詳其世德焉柳氏起於高麗大丞車達爲  
文化之肇祖而逮密直使彥琛錫封于晉州遂爲晉  
州人有門下贊成靖平公珣直提學清白吏謙大顯

于本朝至工曹判書貞敏公辰全以清名直道爲  
明廟朝名臣六世祖統制使珩始以武進遭壬辰難  
涅背以盡忠報國四字有勞有績卒贈領議政晉陽  
府院君諡忠景五世祖忠傑以東宮翊衛當光海昏  
亂抗義構疏事載忠義錄號曰錦沙高祖諱煥然連  
山縣監曾祖諱星瑞贈左承旨有二子諱日章僉知  
中樞府事諱雲章贈戶曹叅判考諱世基贈左叅贊  
無嗣取僉知公胤子 宗廟奉事諱宗基次子爲後  
卽公也妣贈貞夫人安東權氏尙謙女本生妣礪山  
宋氏監役徵遠女以 肅廟庚子生公于公州公字

靜壽幼有器度長而好學學于李判決事以濟文辭  
日就李公亟稱以奇才弱冠治舉子業有名士友間  
以蚤夜力學病膈痞不能親簡編從祖節度公素愛  
重公嘆曰文垂成棄之可惜然吾家世文武並用出  
身事君一也况引滿超距利於病乎勸之射甚力遂  
去書習騎射赴武舉入南行宣傳薦癸酉登式年科  
甲戌拜宣傳官 上臨殿講武臣公以侍衛進講尉  
繚子論張良諸葛亮出處以鞠躬盡瘁死而後已爲  
人臣事君之正 上動容稱善仍詢歷代名將自姜  
太公至李衛公應對根據遂及守都城固人心之方

條陳曉暢 上大加褒獎欲直除禁軍將相臣奏以  
用人宜老其才不必太驟反害晉塗由是只命陞六  
品而詔之以今代儒將傍觀無不變色卽除訓練主  
簿歷禁府都事復入宣傳官差備邊司郎廳拜戶曹  
佐郎遷都摠都事陞經歷丙子出爲長興府使董耽  
津汎舟之役及歸屢辟諸營把摠捕廳從事官癸未  
以通信使從事縱觀日本明年陞洪州營將內移兼  
司僕將戊子爲釜山僉使歸以內禁將歷差各營別  
將千摠濬川司都廳甲午除宣川防禦使明年擢慶  
尙水使歷行首宣傳官出爲永興府使旋拜慶尙左

耳溪集 卷二十六  
兵使明年壬寅出爲會寧府使陞嘉善是歲北路饑  
公賙救有方民無流瘠繡衣褒之晉秩嘉義以副摠  
管歸爲守禦中軍歷踐禁御訓局亞將丙午薦拜三  
道統制使治尙廉簡明軍律嚴海防裘帶雍容約已  
厚下營中工匠常閒軍民大安明年入爲禁軍別將  
訓練都正同知中樞捕盜大將己酉用闡帥父年七  
十恩陞資憲知中樞府事都摠管庚戌拜平安兵使  
引老辭不往以 元子誕生慶陞正憲甲寅轉崇政  
己未壽滿八耄陞崇祿至辛酉寢疾正月壬寅考終  
于京第以三月返葬于公州亥洞負子之原配貞敬

夫人綾城具氏副摠管弒之女生於辛丑歿於丁酉  
十七歸于柳氏養舅姑事夫子孝敬俱摯婦德甚備  
少嘗艱難晚享厚祿至是合祔墓左舉一男孝源武  
科捕將三女適李明鼎李亨植注書南吉寬側出男  
四孚源好源厚源武科主簿教源三女爲沈永之李  
懿喆洪義健妻孝源無子取從兄復源子相亮爲嗣  
武科府使一女適尹寧基庶男二幼女二南永壽妻  
一幼公白哲順偉風儀寬綽才優於幹事量足以容  
物負干城之望有儒素之風可見忠義傳家郤氏之  
詩書有自來矣少有根天之孝事生盡誠居喪以禮

尤篤於奉先之節每值忌辰灑掃庭宇澡濯器皿嘗  
戒家人曰祭不貴豐惟盡其蠲潔將之以誠敬然後  
可期神明孚享矣至八耋癯病不能將事則必攝衣  
不寐坐待祭畢元朝則必扶掖入廟拜伏如節有姊  
早寡無依築室於傍使奉其姑嫜繼其薪米當時公  
亦不勝貧而竭力營辦及喪撫育子女嫁娶而成就  
之推以及於追遠之誠當捕將君在西閩捐割千緡  
置祭田十餘世香火賴而無缺宗族莫不感服此其  
居家制行之懿也乙亥冬歲饑天寒 上臨門召見  
流民鵠衣鵠形數百爲羣 上惻然流涕曰速造襦

衣來予將留見其盡着大臣急召有司遑急無以措  
手公以籌司郎前白大臣請以隨造輪着兼借入直  
鄉軍衣以救目前寒凜待畢造還其人大臣大悅卽  
從其言咄嗟之頃流民無不挾纊喜動 天顏鑿與  
載旋相君稱其才曰柳某之臨機應變真將材也癸  
未航海中流遇颶風帆檣顛倒震蕩舟中惶懼無人  
色公獨晏然不撓曰生死天也不若靜而俟命於是  
衆心稍安而風濤旋定人皆服其大膽有一宰臣同  
行於信使歸後遭危言遠謫人莫敢問公在宣川送  
家奴厚饋之聞者感其高義其急難濟人多施於不

王溪集 卷二十六  
報之地此公之立朝處事之過人者也平生不喜干  
謁無官則下鄉於利祿淡如也廟堂知公廉謹薦授  
平安兵使家人動色相賀蓋世所稱第一腴闔也公  
笑而辭之曰吾年已過稀豈可鐘鳴漏盡爭利於遲  
暮之境也仍誦有子萬事足無官一身輕之句書之  
座右語人曰未報國恩留付兒曹優游晚境豈非樂  
事乎平生以忠義自勉嘗手書孔明出師表於障壁  
間高聲朗誦往往扼腕流涕每論古今名節剖析義  
理處輒激昂慷慨毅然有威武不能屈之色蓋其天  
性然也幸遭 聖明獎涅背之忠纂尊周之編一門

六諡五世八烈奕然耀一世公與有榮焉惜乎才未  
盡展老而知足而嗣子踵武代有山西之望公之遺  
羸尙未艾也良浩遇公於盛壯之時同朝四十年知  
公本末宜莫如我謹最其大節約以韻語刻之麗牲  
之石永示後人焉銘曰

國之山西惟柳晉陽五世八忠燁燁相望公起文史  
承家奮揚以弓易筆匪有短長早膺天問敷奏明詳  
上陳鞞畧下及關防義正鞠躬先葛後張今見儒將  
干城之良騰躡易跌躡級可常中外歷踐履屐皆當  
運粟瀛海帆檝無傷縱觀日出手折擣桑緝盜湖右

耳溪集 卷二十六  
野絕鬪攘哺饑北塞村無瘠瘁三路統轄漆齒拊吭  
廩實器良停工惠商波濤靜謐裘帶翱翔屢佩虎符  
望重龍驤旋授西閩旌節煌煌朝重邊鑰世推腴藏  
曰我老農如穀登場寧復樹藝以聚餘糧引年固辭  
非力難强高風遠識誰與頡頏有子嗣興公其不亡  
伐石紀績于彼亥岡太史秉管我耄非荒

耳溪集卷二十六 終

耳溪集卷二十七目

墓碣銘

曾祖考判決事贈吏曹叅判府君墓碣銘

弘文館副校理天一齋洪公墓碣銘

順興府使洪公墓碣銘

盤桓堂洪公墓碣銘

左議政貞簡鄭公墓碣銘

禮曹判書鄭公墓碣銘

工曹叅判金公墓碣銘

禮曹叅判成公墓碣銘



耳溪集卷二十七

墓碣銘

曾祖考判決事贈吏曹叅判府君墓碣銘

并序

府君諱萬恢字汝廓洪氏貫於安東之豐山鼻祖諱之慶麗朝狀元國學直學是生都僉議舍人諱侃以文章直節名世稱洪崖先生子諱侑孫諱演相繼爲大提學生郎將諱龜麗衰居高陽國革四世不仕至諱履祥德行經術冠士林官大司憲號慕堂卽府君曾祖也祖諱霽禮曹叅判考諱柱元以 穆陵儀賓封永安尉行誼文彩高一世諡曰文懿妣貞明公

耳溪集 卷二十七  
主濟艱以謙居尊以約克享壽祿燾後無窮以崇禎  
癸未正月二十九日生府君於序爲第四幼而穎秀  
讀杜詩北征八遍背文不錯人皆異之旣長風儀儁  
偉宇量宏遠有公輔之望一時名流皆折輩行願交  
已酉中司馬乙卯以儀親直拜掌樂院直長例陞刑  
曹佐郎轉工曹正郎再入戶曹律已以清綜務以明  
長官倚以辦事移他職輒奏仍之首尾幾二十年嗣  
爲郎者咸取式焉戊辰出爲安岳郡守約已裕民朞  
年再迎北使而民不知已已黨人用事出栗牛兩賢  
於廡享府君卽棄官歸民刻石以思之俄而 坤宮

遜于邸府君托痿躄不出門者六年甲戌化新復入  
戶曹乙亥陞繕工監副正丙子銓授濟用監正遷掌  
樂院正實蔭路清選也間兼宣惠郎方開倉頒廩有  
掖隸橫甚卽捽入笞之隸歸訴喉院至請譴罰其奉  
法不撓如此辛巳拜茂朱府使清靜臥治癸未病遞  
丙戌復拜樂正首相崔錫鼎吏書李寅燁言于 上  
曰洪某華閩通才聲績茂焉宜破例用之遂擢通政  
階除豐德府使丁亥棄歸己丑拜僉知中樞庚寅拜  
掌隸院判決事告病免手書遺戒殯歛葬祭一於儉  
約毋循俗焉竟以是年四月十三日考終于正寢六

王汝集 卷二十七  
月葬于東郊牛耳洞府君有至行文懿公末年久患  
風痺府君左右扶將衣不解曉不交者三年文懿公  
口號與書曰汝侍余病至親執厠牖此雖子職當爾  
余嘉爾誠每進藥輒祝天願以身代旁觀莫不感泣  
既喪哀毀淚席爲腐素食竟三年人謂生長膏粱而  
執喪如此尤難云自是常侍大夫人不就第不求邑  
乙丑丁憂執禮如前喪時春秋廬四十餘鬚髮盡白  
篤于兄弟覃及宗族無疎戚咸以依歸一甥幼失母  
收鞠於家從子早卒無嗣府君躬之鄉邑擇遠族以  
立後焉居家恭儉不營產內掌財賦外典州郡官物

不入於家晚年謝客養閒以花石琴碁自娛嘗植海  
棕二盆一日紫衣至門取以 上旨府君下庭跪曰  
臣頂踵皆國恩髮膚非所敢惜然古人有玩物之戒  
不敢以花木進卽拔去之 肅廟稱善仍命盡去苑  
中棕欄太史書之寶鑑夫人南陽洪氏監司命一之  
女元勲領議政瑞鳳之孫內外鼎貴謙順自持大耋  
猶康寧 英廟聞而異之曰是 穆陵外孫婦也特  
賜米絹廩之終其身壽八十八辛亥八月五日下午  
葬于牛耳洞枕庚之岡移府君墓而合封焉舉一男  
五女男重聖有文章官郡守後贈吏曹判書女適左

王溪集 卷二十七  
議政李堦士人尹滌李光佐官至上相後追奪承旨  
趙尙慶牧使鄭錫疇判書一男鎮輔早世贈左贊成  
三女適縣監沈景鎮庶尹鄭錫保郡守李廷衡李堦  
李光佐趙尙慶皆無後尹滌二女歸李顯福李觀周  
繼子光柱府使鄭錫疇繼子克儉贊成三男良漢今  
判書挺漢生員文而天鳴漢今叅判二女叅判鄭晚  
淳府使金亨大其婿也良漢二男樂源樂浚庶子樂  
汶樂濟挺漢無嗣子樂浚鳴漢一男樂游今奉教樂  
源男祖榮樂浚男錫榮良漢鳴漢後改名爲良浩明  
浩嗚呼小子生晚而早孤我曾考嘉言懿行聞見皆

不逮幸有王考所撰狀會乞樹墓之辭於伯舅樗村  
沈先生銘已就而序未完先生遽沒當世長德無可  
托重者謹撮狀文而約之仍用樗翁之銘豎諸墓門  
庶幾百世之後知斯言之不誣也銘曰  
奕世名闕通才偉器薄試其餘非藉外至使之羽儀  
澤利其宏惜不公卿爲國榦楨遭時艱屯秉義杜門  
拔樹獻規一言格 君惟孝惟儉家傳懿則以是銘  
公我無媿色

弘文館副校理天一齋洪公墓碣銘 并序

公諱重鉉字大玉卽我豐山名闕也肇祖諱之慶起

麗季以鄉貢中魁科官國學直學生諱侃官都僉議  
舍人以文章名世號洪崖數傳至郎將諱龜見麗政  
亂棄官歸高陽值革代累世不仕至諱履祥以經術  
行義爲 穆陵名臣世稱慕堂先生是爲公高祖也  
曾祖諱靈黃海道觀察使祖諱柱後沔川郡守考諱  
萬最僉知中樞府事妣贈淑夫人高靈申氏正郎起  
漢之女歸來亭末舟之後也舉男子八人公其第四  
也以 崇陵庚子生聰秀異凡兒不好童子戲甫入  
學已知自力及長文辭益進下筆數千言詩不喜刻  
礪尖巧而瞻鬯有理致以 明陵甲子中司馬試戊

辰魁三日製己巳增廣直赴唱名隸承文院庚午拜  
侍講院說書冬陞司書辛未遷司諫院正言選知製  
教壬申除兵曹佐郎癸酉移持平選入弘文館爲修  
撰尋出爲永柔縣令甲戌春復除副校理未赴召會  
朝著大變當路者以公嘗在諫院叅趙師錫南龍翼  
遠竄之啓追成罪投慶州縣民攀轅號泣各贈土物  
助行公盡却之人謂公曰餽有名奚過善意盍效山  
陰大錢乎公笑曰吾則不直一錢耳明年宥還遂卜  
居于忠州籠巖山下未幾僉知公在京第患風症公  
入城扶護凡六七年以辛巳春竟遭艱公年已衰而

耳溪集 卷二十七  
守制無違禮人以爲難喪畢復歸鄉廬後十九年  
懿陵御極復授修撰時當路者修宿憾復持前事遂  
解官 元陵甲辰拜成均司藝乙巳除司僕寺正承  
文院判校江陵府使皆不赴以丙午三月二十六日  
卒于鄉第以其年六月葬于家後癸酉移葬于老隱  
洞洪谷壬坐之崗公爲人魁梧亢厲不拘小節能文  
章喜飲酒談論風生壓倒一座見人不可意處雖貴  
勢不少饒婦黨方柄用欲援引公公素惡其爲人語  
內子曰彼獲良死幸耳張希載倚勢鳴張嘗宴會傾  
朝廷意欲致公而不肯往未幾世局又變公屏居久

公議將起之會族人當路邀所親銓官勸與交懽酒  
酣致慙勲公瞪目奮髯曰士君子寧隨若曹媒富貴  
耶其人怒而起公坐是遂廢噫士大夫立身行已貴  
以風節自持彼隨時俯仰者無足觀矣公立朝三十  
年風稜足以動人才具可以需世苟能耕去崖角平  
步旅進則何官不可而獨偃蹇不少周容終身擯斥  
而不悔真可謂古之士大夫也公初娶驪興閔氏兵  
曹正郎弘道女左贊成點孫沒先公再娶青松沈氏  
士人世共之女沒後公葬並祔公閔夫人舉二子三  
女子長元輔次宗輔女適李漢輔鄭應斗鄭弘濟沈

耳溪集 卷二十七  
夫人舉三子二女長縉輔次綸輔次寅輔女適金學  
基李濟完元輔三娶無嗣取宗輔子忠漢爲後一女  
適進士李寔宗輔有五子三女長忠漢次應浩次懿  
漢出爲魯輔後次志浩出爲惠輔後次思浩女適金  
養五鄭熙中李璞休縉輔有二子籌浩策浩綸輔無  
嗣取策浩爲後寅輔前後娶各有一子長次奇十四  
殉於孝君子勿之殤也次爽浩李漢輔有三子德胄  
惠胄憲胄女適鄭熙佐權景彥皆進士鄭應斗有一  
子師先一女適丁志覺鄭弘濟二子東璞東瞻三女  
適姜世玉姜致勤張胤文金學基有繼子永欽李濟

完有二子是慶國慶銘曰

士之立朝如木在山風迅則靡雪虐則殘鬱彼松栢  
亭亭上干不倚不挫其節獨完公惟特立抗志難攀  
升載高臥素履安閒紛紛俗曹視人眉間誰投腐鼠  
有駢其顏天一之臺其水高寒我酒我斟我琴我彈  
骨兮歸土氣不可刪以詩銘公筆下生瀾

順興府使洪公墓碣銘

并序

公諱獻輔字伯圭寔我豐山大姓國學直學之慶肇  
起麗季洪崖公侃文章名世其後連二代入館閣逮  
我朝慕堂先生諱履祥重昌門戶流慶後世是爲公

五代祖考也禮曹叅判諱彙高祖也曾祖諱柱國以文學雅望號泛翁官禮曹叅議祖諱萬選名行重士類號流巖以蔭官掌樂院正生祖諱萬迪司憲府持平再闡黃甲有盛名而官不長考諱重考出後於流巖官光州牧使娶恩津宋氏牧使炳翼之女同春堂文正公之曾孫也以肅廟辛卯生公幼英爽有俊氣乙卯升上庠癸亥除泰陵叅奉陞濟用監奉事尙瑞院直長長興庫主簿丁卯移戶曹佐郎由宗親府典簿調龍仁縣令己巳遞庚午復入戶曹除公州判官判書啓仍之冬出爲和順縣監癸酉遞甲戌除

禁府都事免去丙子拜司禦旋知果川縣丁丑遭內憂壬午戶曹自辟爲正郎時有扈衛軍特賞之命公按例不進細布忤旨編管金海未幾宥粵明年忠原縣監缺公名在副擬上越次授之曰是必能了此邑矣冬以病遞丁亥又入戶曹己丑除金堤郡守壬辰陞順興府使甲午適歸司僕寺辟爲判官丙申移長陵令自免明年復除司僕蓋公清幹守法見知上下故歷任外內未嘗久閒而治行皆茂丁酉七月六日以微病終士友莫不驚惜淑人南原尹氏郡守翼駿之女婦德咸備不幸短命壽厯三十四公哭之曰



王溪集 卷二十七  
失一賢師也畏友也遂終身不復娶表兄李叅判彞章誅之曰秉心皎白平直無一點苟且簡默莊慎令人起敬蓋君子之所難也葬于忠州冷谷辰向之原至是合封焉育四男長冕浩縣監次彞浩進士郡守次綱浩端浩庶男鍾浩女適朴萬榮冕浩無男以端浩子義喆爲后二女適鄭東勉鄭東晏彞浩二男義瑾義瑜二女適朴元榮韓用鏞端浩二男義後義喆一女適鄭大始公儀容秀雅豐準美鬚髯性剛毅簡重持身有桀範終日凝坐罕言笑嘗書朱子十訓置案上以爲檢身之符至屬纊前夕猶整飭衣襪此律

已之嚴也事親服勤不違有疾問藥見醫必拜居喪躬饋奠三年不廢經帶處兄弟和教子姪嚴罵詈不及於僮僕閨門肅然此內行之懿也篤於故舊不以禍福移易人皆信服嘗鬻宅授其金於鄉居庶戚不問其出入旣累年買一溪山奧區歸其券聞人急趨救不憚夷險在地部管江倉乞米者填門應之無倦色此接人之厚也雅尚高潔恬於進取未四十廢公車棲棲末宦非其志也未嘗一開口於求官稍腴之地輒避之赴外官未嘗二三年淹簿餘盡散之吏隸餽遺絕於朝貴政務清簡而吏民感服太僕久任

有能者而一府誦其仁明此居官之績也槩其器局峻而正操履敦而確才識敏而通使之需世無適不宜而沉於下僚終不克展布識者莫不稱屈公則退然不自多常恐名過於實祿浮於德年厯中身而營菟裘於湖峽爲終老之計此可謂高於人一等矣尤於追遠收族之義誠意惓惓良浩以宗黨後生未嘗不感歎而模法焉今公仲子彝浩持公執友素谷尹公之所爲狀徵銘於良浩謹敘次而系以辭曰  
法以承家莊以律身廉以範俗信以孚人口不言官而官自至跡不蘄隱乃隱於吏懷峽十畝之桑人指

清士之庄忠原四尺之封民護仁侯之藏

盤桓堂洪公墓碣銘

并序

盤桓堂洪公諱曰千環字曰羣玉貫曰豐山始祖曰之慶高麗壯元國學直學二世曰都僉議舍人侃有文章號洪崖三世曰侑四世曰演皆官大提學五世曰龜以郎將麗衰棄官歸高陽有見幾之明六世曰伊入我朝爲南平縣令七世曰樹成川府使居羅州金鞍洞長子孫爲湖南士族八世曰貴枝生員以文行爲世所推是爲公高祖也會祖諱漢良內禁衛祖諱孝孫叅奉贈叅議考諱應福贈叅判妣竹山安氏

耳溪集 卷二十一  
定國之女也公生於嘉靖癸丑天姿超異志氣豪爽  
從學于苔軒高公高峰奇公之門聞栗谷李先生倡  
明道學負笈往從之受性理之學先生甚器異之弱  
冠常參進豐宴有一高官令一名妓舉杯進其意中  
人妓環視四座特進於公高官曰誠是風流男子也  
仍命其妓曰今夜汝侍洪秀才不者當重罰妓瞰公  
居終夜立門外公不開視妓泣而去時許筠以少年  
才藝擅名洛下一席讓頭於公深忌媚之自是公名  
播士類所與遊皆一代之勝鄭介清爲羅州教授考  
講諸生公不肯就介清囑本州牧撻公公素惡介清

爲人斥之嚴及己丑獄起人服公之明見而其黨疾  
公甚故許眉叟穆記言曰相國澈陰囑湖南士人洪  
千環釀成己丑獄有撰照鏡錄者極構松江及公云  
壬辰變起金健齋千鎰倡義旅公從之募兵糧把守  
江華又與諸公漕運義穀三千石于龍灣上疏行在  
請奉世子南下 上召見之特賜原從勲券賊臣李  
弘老投凶疏誣稱成渾謀與世子分朝上下疑阻公  
有詩曰龍灣消息報龍岡鶴駕言旋鐵甕城未死小  
臣今不忘當時人道布衣榮丁酉再亂以從事隸都  
元帥權慄幕草檄召募多出公手獻元帥詩曰坐扶

五溪集 卷二十一  
宗社危顛後已了桑夷指顧中幕揭蓮花曾奉檄鶴  
垂霜翅孰開籠于時奔走海防或渡海至耽羅登快  
勝亭有詩曰帷幄從容號令明煙霞萬里入談兵公  
常見許筠詩以扇簸之筠深銜之每當試官輒物色  
拔之故蹭蹬不第年四十九始中司馬第二公素與  
趙竹陰希逸善及入會圍題揭龍門賞雪賦竹陰謂  
公曰將何以製公曰欲效赤壁賦竹陰曰壯元則讓  
於我君其次之公笑而許之及榜出果然一世傳爲  
美談嘗渡漢江作詩曰白頭頻渡漢江舟津吏皆言  
老可休笑答太公年八十却辭清渭佐西周已酉增

廣魁殿試考等上之上榜下趙緯韓張維李敬輿皆  
當世文章鉅儒也直授典籍出爲羅州教授兼提督  
官又差南原教授一種不悅之徒益憚公顯揚削名  
青衿錄揭榜成均館曰附托姦黨戕殺大賢姦黨指  
鄭松江大賢指崔永慶也公門人爲師訟冤鄭畸翁  
亦爲父陳疏洞卞之及甲寅獄起國舅延興公邁慘  
禍李公恒福徐公潛黃公慎俱竄北邊臺臣柳活李  
志完啓請顧命七臣削職賢公卿一時被逮公亦坐  
繫獄尋放還遂遺落世事築室于松臺澗水之邊以  
文酒自娛白玉峰題詩曰小逕通林別有村清溪渡

耳溪集 卷二十一  
盡到柴門十年心事一樽酒坐對梅花無所言郭寒  
碧詩曰生憐洪典籍濩落世誰如心事詩千首行裝  
書一驢珠躡何門履劔歌幾舍魚今天無老眼白首  
漫躊躇李東岳詩曰高步詞壇第一頭鏡中無奈髮  
絲稠對揚今日悲歌意湖海蕭條又過秋乙卯公如  
海州口占憶昔詩曰衣儒衣者冠儒冠三十年前佩  
麝蘭憶昔先生勤獎掖能令小子更盤桓戊午瞻拜  
河西書院次權石洲柳西垞詩二首曰東方出處肇  
成蹊千載河清吾道西美質生知形上下遺書入德  
履階梯同圓新霽千江月交翠時觀百草泥親炙當

年雖未及院中瞻拜妄思齊又曰德水千年應篤生  
工夫半世在明明乾坤醉裏身爲度日月閒中律厥  
聲入室升堂知次第窮通出處久全名聖神際會酬  
詩畫和氣冲澗寫性情公平生景慕河西曠代相感  
如此庚申出爲碧沙道察訪當時名士皆贈詩以別  
北渚金公塗詩曰狀元聲價斗南高郵吏功名白首  
勞他日遠圖鵬運海卽今能事馬騰槽靡蕪草綠山  
當驛枳殼花深水滿濠聞道沔陽連錦里莫將哀怨  
賦離騷壬戌遞歸朝議充本道宣諭使年滿七十例  
陞通政僉知中樞府事八耄終于家葬于金鞍洞塔

耳溪集 卷二十一  
嶺負巽之原夫人羅氏進士社之女松齋從姪也先  
公卒葬同兆生二男未長丁酉之亂公從王事在外  
二兒爲倭所俘去側室男有崖進士叅奉有崖亦無  
子公之嗣遂絕哀哉丁巳歲吳楸灘允謙之使日本  
也公賦憶子行以贈之其詩曰想像扶桑千萬里家  
豚曾作牧羊兒逢人不忍說丁酉吊影那堪度日時  
頭戴昊天思罔極眼穿初旭返無期請君細聽猿吟  
處腸斷三聲淚自垂又曰送君持節向南夷說我深  
情淚自垂舐犢難堪含痛日號猿不忍斷腸時閨華  
寂寞中郎女家業淒涼伯道兒此去儻成相見願他

生結草恐無期聞者莫不隕涕噫以公高明之學宏  
博之文剛正之氣遭時艱虞困于羣小坎壈以終身  
及遭運啓休明而公已老遂不得顯用於世志士之  
恨固已無窮至若二子之陷於殊域實爲人倫之至  
痛而高才盛名不祀忽諸所謂天道之難諶者非耶  
嗚呼悲夫公之沒已數百年曾因多士之議配食於  
月井書院與朴思菴鄭松江金黃崗沈青陽四賢同  
享而墓道獨無片石之表羅州宗人相與蒐輯遺事  
圖所以不泯徵辭於良浩同祖之裔也義不敢辭謹  
撰次其大節系之以詩曰

王溪集 卷二十一  
師有大賢蹈繩絜尺友有羣英鳴球戛玉倡義赴難  
浮海千斛辨姦斥邪燭照龜卜雄辭噴湧如水趨壑  
射策天門名冠鴻碩才高命蹇飛沙伏蜮或繫之綫  
與時伸抑二子乘舟影沈蛟鰐腸摧眼枯念彼骨肉  
伯道無兒蔡女誰贖荒涼短壟蕭瑟喬木月并有祠  
四賢同食魂其無餒我銘在石

左議政貞簡鄭公墓碣銘

并序

英宗大王二十四年戊辰冬十有二月八日領敦寧  
府事鄭公以賀正使如燕卒于行 上惻然悼之賻  
庀加等錄其孤禮葬于廣州之省達里命太常議易

名孤子養淳引先訓辭越六年癸酉 上臨朝興思  
詢大臣特賜諡曰貞簡後三十五年丁未嗣孫東蓋  
將樹石于墓謁辭於良浩公位至宰輔歿於王事法  
宜銘謹按公諱錫五字攸好東萊人也其先自左僕  
射穆顯于高麗逮我朝名德相承文翼公光弼相  
中宗文翼之孫林塘公惟吉水竹公昌衍父子相繼  
相 宣祖 仁祖水竹之孫陽坡公太和相 仁祖  
孝宗 顯宗勲庸奕世比漢之袁楊陽坡第五子諱  
載崙尙 孝廟女淑靜公主封東平尉出後於仲父  
左議政諱致和忠蓋謹畏爲儀賓模楷是爲公大父

耳溪集 卷二十一  
也考諱孝先贈領議政娶驪州李氏副率萬徽女早卒無育東平公請於朝以伯氏叅議公諱載岱之孫爲嗣卽公也本生考諱赫先牧使贈判書妣延安李氏縣令泳女公降于 肅宗辛未九月二十五日乙未登科隸承文院戊戌入史薦自檢閱轉待教例陞典籍臺省則正言持平講院則司書文學弼善輔德瀛館則修撰校理應教常帶知製教 英宗戊申擢同副承旨是年逆變起 上親鞫囚特任公刑房轉至右承旨亂平以勞擢嘉善階兼同知義禁府事尋薦授江華府留守翌歲解歸辛亥喪生妣癸丑喪生

考服竟拜都承旨丙辰差賀登極使赴燕丁巳以廟堂薦拜吏曹叅判自是周流六曹漢城左右尹大司諫大司憲兼帶則同知經筵春秋館義禁府五衛副摠管備邊司堂上提調則司饗尙衣承文院繕工觀象監長興庫掌苑司圃 宗廟署內贍奉常寺校書館戊午拜咸鏡道觀察使己未罷尋敘拜吏曹庚申觀察京畿七月特擢刑曹判書旋移兵曹遞拜右叅贊壬戌春由禮曹判書進長吏曹當是時朝論睽激互相引軋搢紳大夫罕有超然於黨伐者 上患之嘗任二三大臣付以調平之責贊成建極之治而居



耳溪集 卷二十一  
銓衡者瞻顧牽攀陰濟其私公自在亞銓時中立不倚未嘗隨衆俯仰屢爲彼此黨人所擠齟上察其然也遂畀政柄仍行大政公感激知眷秉公絕私校理鄭寀疏攻之公引義辭上歎曰秉公之人難容於今之世矣勉許之移拜右叅贊辭遞西敘知中樞事又長禮曹兼內局提調癸亥正月莊獻世子患水痘公直宿禁中旣安賞加正憲五月有鞠獄特旨擢判義禁間拜叅贊判尹甲子三月復授兵曹四月上不豫又以內局移直勞陞崇祿六月行大政被持平朴致隆之詆乞免復拜判義禁憲臣尹光天請改

大訓 上震怒將刑之公力陳其不可臨罷進曰罪人願見老父而死 殿下旣感其言宜令速出獄上卽命發配他日謂筵臣曰判金吾終始力爭秉心公矣古語曰臧文仲必有後於魯鄭某亦云尋差宣惠堂上乙丑拜戶曹判書守舊條損冗費雖係內用不憚也嘗面奏曰近日經費視先朝倍加請一切裁削 上善之曰夫人不言言必有中每稱確哉真度支丙寅九月趙右相顯命乞解職 上問誰可代卿者對曰廉謹守法無如鄭某領相金在魯亦曰端疑簡約人也於是拜公爲右議政三疏辭乃入謝首

陳和叶朝象節用愛民之道 上嘉納焉是時將選館錄會都堂公力主均平領相議不合而罷翌日上召問之命如公言十一月陞左相兼世子傅司僕寺都提調先是靈城君朴文秀以直言忤時議會冢宰缺議薦代右相閔應洙欲拔文秀於舊望將遂錮之公持不可領相時在告亦陳劄頗侵公 上命進薦紙手書朴文秀名以下兩相不敢復言公性本怡和不露圭角黨人始不甚忌及入相也當事毅然守正不撓由是衆怒交騰公夷然笑曰吾備位三事今老白首矣何忍附時論渝素心耶以此顛沛吾不動

一髮矣已而金陽澤之疏果發語絕悖公卽納符過

江 上黜陽澤於外趙明履朴弘備等紛然起矣

上並嚴斥之慰諭公甚摯疏凡十三上六閱月始勉許曰失我良相如亡一股移拜領敦寧屢諭趣入城公惶恐承命而閉門謝客不復與朝議戊辰差冬至兼謝恩使入柵至十里堡感寒數日遂不興方革從者泣請所言公神色自若曰家事臨行已處置但恨委 君命於草莽耳將斂發衣笥中有喪禮書小紙書曰朝鮮國年貢正使蓋銘旌式也觀者異之良浩少時從公子弟遊望見公顏色白皙美髭鬚進止雍

雅和氣襲人槩公立朝則以陽坡公爲師不立標榜  
謹守典章迭秉兩銓門屏蕭然居家則遵東平公遺  
訓謙恭儉約篤於內行事丘嫂如母教孤姪成立終  
至大官宗族爲之感化論者謂身爲公卿操履如寒  
士防範若室女者惟公而已故風波推盪而个然無  
累身與名俱完云貞敬夫人彥陽金氏叅判致龍女  
一男卽養淳官郡守二女婿徐晚修曹允明郡守三  
男東蓋東協皆郡守東喆直長夫人生後公一年終  
于庚寅合葬于廣州面坤而祔余於壬寅歲奉使度  
遼問所謂十里堡蓋瀋陽東界店舍也居人尙傳爲

朝鮮使畢命之所爲之徘徊悽愴而不能去噫公官  
旣高年且耆再適遼薊可謂賢勞矣然而 聖主憂  
之而不辭親戚挽之而不顧視死異域安如正寢真  
所謂知輕重大丈夫也已詩云或息偃在床或不已  
于行食君之祿而避險趨易者其視公何如也銘曰  
王臣匪躬達人安命當事不讓惟上之令漭漭遼野  
冰雪凌競怡然就車皓髮垂領再涉殊方不見幾微  
從者涕洟言不及私以若所守可屬大事溫溫玉佩  
獨立不倚無競無綵惟義之視凡百君子盍觀終始

禮曹判書鄭公墓碣銘

并序

公諱光漢字良甫初字秀夫溫陽之鄭以高麗戶部  
尚書貞僖公諱普天爲初祖入本朝世有簪纓有曰  
順朋右議政生諱礪有生知之姿博通三教世稱北  
窓先生生諱之復無嗣取從弟叢桂堂諱之升子時  
爲後官察訪寔公之高祖也曾祖諱麟卿官承旨號  
蒼谷祖諱純陽贈吏曹叅判考諱壽淵官佐郎贈吏  
曹判書妣驪興閔氏縣監宗魯女贈貞夫人皆以公  
貴也公生於 肅廟庚子姿質妍秀聰慧劬學不懈  
未及成童荐罹外內艱伯氏贊成公又殉於孝公子  
然孤惻依倚伯嫂婚娶成長而家本寒素朝晡屢空

公憤勵攻苦弱冠有聲場屋甲子與仲氏旌善公聯  
璧中生員試甲戌登漢陽道科在堂后記注贍敏選  
入翰苑自檢閱至待教旋陞六品乙亥除兵曹佐郎  
移拜司諫院正言司憲府持平秋以京試官赴嶺南  
還差闡義昭鑿纂修郎廳丙子辟入騎郎軍色移除  
侍講院文學以 東宮痘患平復受錫馬之賞冬製  
春帖子 上以勉戒切實深得講官之體特賜表裏  
連除吏曹正郎戊寅選入弘文館除校理自是遍歷  
三司諫院則至司諫憲府則至執義玉堂則至應教  
兼知製教學教授己卯 王世孫冊禮設講書院公

首除左贊讀奉竹冊用勞準職拜司僕寺正兼侍講  
院弼善陞輔德以繡衣按查嶺南殺獄還除應教兼  
右翊善又因旱災特差畿獄審察御史庚辰復拜應  
教 上親臨玉署講書宣饌手書八字分賜儒臣其  
賜公曰東溟傍孫名登華顯與諸僚進箋謝恩冬奉  
命三水甲山等邑廉察民隱辛巳差 世孫嘉禮都  
監都廳壬午以勞陞通政除承旨序至左尋拜兵刑  
曹參議大司諫冬特除楊州牧使癸未解歸甲申入  
喉院以禮房加嘉善陞拜都承旨連除漢城府左右  
尹刑曹參判同義禁副摠管丙戌薦授義州府尹建

塾以訓士築堰以惠民灣人至今賴之戊子適除大  
司憲差承文院提調兼同春秋癸巳拜兵曹參判乙  
未又除都承旨旋適是時 聖壽已踰八耄 玉候  
常在靡寧屢下 東宮代聽之命而柄相戚畹表裏  
秉權輒事阻搪恣行顛弄公歎曰堯倦舜攝此其時  
也時相之爭難何意也徐忠文命善時以亞卿在同  
閑慨然發憤將抗疏斥柄臣之沮代理者公贊成之  
疏入 上卽黜柄臣擢拜徐公正卿朝著以靖公未  
嘗自言世亦無知者丙申今 上臨御庶政維新公  
拜同經筵旋出爲京畿監司時當 元陵復土之役

耳溪集 卷二十一  
責應浩繁公隨便措置事集而民不知勞未幾因事  
適敘拜工曹叅判差明義錄纂輯堂上丁酉大臣以  
公才譔與久次筵白擢授資憲階拜知敦寧移判尹  
刑曹判書兼籌司堂上知經筵義禁府都摠管戊戌  
除冬至正使赴燕己亥還拜禮曹判書兼知春秋同  
修 英廟實錄以仁墓監董勞陞正憲移拜議政  
府右叅贊兼帶提舉則司譯院水庫司導寺典牲歸  
厚署庚子薦授咸鏡監司旣肅命一日接賓客如常  
夜忽氣憊就枕卽逝卽正月十一日也享年止六十  
一窆于豐德杜陵洞壬坐之原公早失怙恃幼少孤

苦篤於奉先厚於敦宗外貌溫雅中心樂易與親友  
交言笑欵曲裏襮如一無老少貴賤咸得其歡心居  
官奉公不擇夷險見事詳明必中肯綮人有所疑多  
就質焉綜於吏務所居官有著績民有去思爲文辭  
敏速剴切疏章狀牒指陳事實明暢易見俱得緊要  
人多推許丙申以後浸浸嚮用位躋六卿而才未歷  
試壽僅周甲朝野莫不嗟惜公嘗病世之無其實而  
美其號者遺命勿請諡斯可見謙冲之操也公娶龍  
仁李氏生員宜集之女有婦德勤儉持家生以辛丑  
歿於乙巳葬祔公墓左舉二男三女長昌老庶尹次

耳溪集 卷二十七  
昌耆判官出後仲氏旌善公女歸李義弘李相謙李  
啓祚參奉昌老男觀始女適趙雲紹昌耆男倫始侄  
始女適尹致魯李義弘繼子日淵李相謙男奎榮箕  
榮女適曹鴻振進士李啓祚男運萬不佞與公齒相  
隣室相邇自勝冠共筆研治功令相先後決科立朝  
言議出處無或違貳暨公從子二尚書同周旋相得  
懽如至老白首所謂竹馬之舊要也公不幸先逝公  
兩姪亦相繼凋謝老我獨寄斯世踽踽然無與語每  
憶曩時從遊之樂邈若前生事未嘗不悄然永傷今  
公次子判官君列公家狀來徵墓石之辭嗚呼悲夫

遂投涕而敘之銘曰

士生斯世不易受者才不可值者時旣才之得又時  
之宜不引其年則未究厥施如公者抱需世之器遭  
愛才之 主翱翔乎外內馳騁乎華廡沛乎若熟路  
之車翼乎如乘風之羽忽中途而隕跌嗟其命也不  
忤惟其慈諒之性敏悟之識投之而無不入試之而  
無不適歛若無而不言今其歸也安覲良朋爲之永  
歎同朝莫不共惜留片石以示後尙勿犯乎芻牧

工曹參判金公墓碣銘

并序

公諱致龍字天用彥陽之金已顯於麗初威烈公就

耳溪集 卷二十七  
礪與子倫相繼入相勲伐赫然入我朝冠纓不絕觀  
察使受益叅判赭最著曾祖諱挺立居昌縣監祖諱  
哲四山監役考諱南甲聞慶縣監贈叅判妣南陽洪  
氏觀察使得一之女以 孝宗甲午生公聰穎絕人  
刻勵爲學十九中發解二十二俱中生進文詞稱於  
輩類辛未登文科時才經已巳黨人滿槐院異已者  
無不抑之遂置公國子公議駭惜甲戌改紀首選假  
注書旋陞六品爲典籍遷監察禮曹郎尋移兵曹冬  
拜司諫院正言疏陳湖西軍田之弊丁丑除司憲府  
持平因虹變進消弭之策 上嘉納戊寅拜侍講院

文學是後屢入臺省爲持平也以趙亨期之遞接伴  
使金時傑徐宗憲之避繡衣爲紀綱不立百隸怠官  
疏論之 上獎以得體爲掌令也掖屬有貽害都民  
者公坐府捕致之法仍請推內官都下肅然遞拜軍  
資奉常寺正司書弼善掌試湖西庚辰復拜掌憲己  
卯科獄起公首發啓請究覈諸干連者端緒益露科  
黨胥怨之間經司僕正獻納司諫弼善辛巳拜安州  
牧使以前官仍任適移拜執義司成輔德時禧嬪張  
氏賜死公疏陳保護 春宮之意及將啓劄聯疏言  
王世子禮宜臨哭請博詢處之卒從其議五月復拜



王溪集 卷二十一  
安州地直關西孔道北使數月疊到冠蓋交絡而接  
應有方民以不煩承召歸邑人奔走請留甲申以  
英宗吉禮都廳勞陞通政階卽日拜同副承旨尋除  
兵曹叅議復拜右副序陞至左秋以廟堂薦授義州  
府尹公出自近密莅邊府銳意刷弊堰楊下江蒞募  
人入畊歲收穀累百斛官民至今賴焉填闕伍葺軍  
械修頽廨一府改觀及罷還灣人豎碑思之戊子秋  
差冬至副使拜戶曹叅議庚寅薦授廣州府尹是爲  
畿輔大邑保障重鎮軍餉糶糴至於十餘萬石時值  
大歉而不鞭一人遠近負戴而至治聲播聞辛卯四

月陞江原監司 上引見論之曰卿久在近密處事  
精詳今畀以方面意非偶爾公感激 主知單心奉  
職是歲嶺東大水人家漂墊或至千餘一方喁喁公  
馳聞拯救咸得奠接嶺人至今頌之壬辰瓜蒞爲工  
曹叅議判決事冬拜豐德府使丙申拜慶州府尹地  
廣物衆最號難理前後莅官者率皆待火罷衙公晨  
起視事簿牒山積耳聽詞目閱簿判署如流須臾而  
盡之談笑優遊畧無倦色一府莫不驚異丁酉解歸  
己亥拜安邊府使歲饑善大賑按臣請褒賜表裏辛  
丑瓜蒞拜承旨禮曹叅議旋陞資差謝恩副使未赴

壬寅 肅廟祔 太廟以禮房承旨陞嘉善拜漢城  
右尹移兵曹叅判同知義禁府事癸卯拜工曹叅判  
兼副摠管甲辰八月五日終于正寢十月葬于木川  
近先隴也貞夫人延日鄭氏佐郎淹之女舉二男一  
女長箕錫司諫次奎錫庶尹女適左議政鄭錫五司  
諫四男聖淵廣淵進士普淵進士近淵庶尹無子以  
普淵爲嗣四女適郡守韓世裕士人李商喆李址淳  
徐後修議政一男養淳郡守聖淵二男若采岳采廣  
淵取普淵子絢采爲後普淵三男綱采郡守絢采純  
采近淵男尙采玄孫不盡記公姿性端良風儀雅重

不事交遊常以書史自娛而立朝則才優而識敏處  
近密數十年入奏出宣練達故實以此受知於 明  
主歷試內外未嘗少閒也屢典大府至於方面而治  
皆恢恢恬約節用庫儲充盈成績可傳及滯關北遭  
國哀號慟屢日寢食俱廢暨晚年疾篤口呼東藩時  
別諭一通以授子弟曰國恩未報以是愧恨無一言  
及家可見平日向國之誠矣夫人事尊章無違志躬  
操織紉老而不廢公賴以忘家事通曉文史手錄孝  
子烈女嘉言懿行以示子女宗黨誦法焉壽踰八耄  
後公十四年歿移公墓合葬于稷山茅山里坐乾之

岡郡守君以余有同開之舊具公事行徵樹墓之辭  
謹撰次而系之詩曰

明陵御世羣材畢達惟公受知實自喉舌敷奏辨析  
天顏怡悅舉世朋膠不受衆涅處身孤貞居官簡潔  
三尹大府一按藩闡賦政優優有猷有伐外內績茂  
秩貳卿月暮境寬樂兒孫盈膝耿耿報國發於臨絕  
天興之里山峭水冽公靈所遊永世罔缺

禮曹叅判成公墓碣銘

并序

成氏出自嶺南之昌寧縣遠祖仁輔爲高麗中尹松  
國門下侍中以孝行俎豆於勿溪書院至政堂文學

汝完逮我朝以前朝遺老拜門下侍中昌寧府院君  
辭不就諡文靖若典文衡靖平公石因恭度公拵恭  
惠公念祖文安公任世承名卿簪組不絕至諱昌秀  
有文行蚤卒贈司僕寺正於公爲曾祖也祖諱壽雄  
富平府使贈吏曹叅議考諱德馨戶曹佐郎贈吏曹  
叅判三世以公貴也妣延安李氏縣監之老女公諱  
天柱字子擎自號老雲軒以 肅宗壬辰生神姿超  
凡穎悟絕倫甫三歲知屬文八九歲貫穿經史十六  
委禽于良齋崔公之門崔公大器之乙卯中司馬兩  
試癸亥擢庭試文科卽入翰圈薦拜侍講院說書一

耳溪集 卷二十七  
日侍書筵 世子出示一幅紙有詩曰日出東方明  
四海月光中天照萬山公進日月露之吟非帝王當  
務而此句則與宋太祖日出詩彷彿矣 世子因以  
賜公李相國宗城言于 上曰某也學識淹博宜專  
任輔導之責 上曰人亦雅飭世子有嚴憚之色講  
官一說書足矣每稱春坊主人後公奏曰臣三年侍  
講深知 睿度正大淵凝有作聖根基昔程子請於  
宣仁太后曰皇帝動息起居必使經筵官知之古今  
有異雖不敢仰請而至於保蓄之道伏願深留 聖  
念 上嘉納焉冬都堂將選瀛錄 上謂大臣曰成

某真學士特命陞六品拜副修撰時 上違豫久停  
法講聞公入直特命召對講資治通鑑 上曰褚遂  
良愛州之表豈不苟且乎公對曰遂良大節凜然此  
等處宜濶畧爲人臣者固當責備而在人君則宜哀  
憐其心痛恨高宗矣 上動容稱善因奏曰自古人  
主春秋晼晚漸難如初臣以天行健三字符仰勉矣  
後日登筵奏曰內宴時當用女樂 東宮血氣未定  
外誘易惑請於內習儀時勿用女樂 上曰此爲元  
良血忱錫馬以獎之丁卯遭外憂戊辰荐丁祖妣喪  
承重辛未服除拜修撰以試才御史往沁都歸拜獻

王漢集 卷二十一  
納自是連拜館職兼文學中學教授間拜 世孫講  
書院左贊讀右翊善司諫兼弼善司僕寺正漢學教  
授輔德副校理十二月 上以合啓之不停出御彰  
義宮大臣百官庭籲請 還宮而不能得公再陳啓  
得請朝廷倚重焉嘗採程朱兩賢及張呂論史諸書  
名曰讀史要訣以進於 東宮又寫進洪範無逸篇  
陳勉焉嘗以考官入侍 上問周禮當夕之數公對  
曰臣則以爲三夫人九嬪當屬後宮世婦御妻不過  
女官鄭玄雖曰大儒妄下註釋啓漢唐人主廣置後  
宮之弊後世人辟所當存警旣退李相天輔南公有

容相與歎曰數十年來經席無此言蓋是時後宮有  
新封爵故云癸酉 上受尊號差宣教官以勞陞資  
甲戌拜兵曹叅知移同副承旨進右副已而乞養爲  
清風府使吏畏民服政清訟簡丙子歸民刻石記惠  
丁丑拜兵曹叅議移大司諫戊寅拜禮曹叅議壬午  
除安州牧使閏五月間 莊獻世子諱音率士民哭  
臨四日素食三月痛念國事鬚髮盡白癸未薦拜江  
原監司乙酉瓜遞丙戌拜大司成 上曰此人文學  
實合此任未幾特擢兵曹叅判兼同知義禁府事槐  
院提調副摠管丁亥特授都承旨己丑拜禮曹叅判

王澐集 卷二十七  
大司憲十一月丁內憂公年已五十八歲不脫衰經  
哭擗如禮服畢拜刑曹叅判薦拜江華留守 上曰  
江留官至二品而尙如儒士居二年修築城堞保障  
增重丁酉拜同知春秋已亥特授知申事召見謂之  
曰久不見卿何衰憊至此姑許遞竟以六月十二日  
考終 上惻然曰向日登筵語意悽悲是君臣永訣  
也可惜哉文學命賜吊祭是年十月葬于公州豐德  
洞乾坐之原不佞少日從公遊公長我十餘歲待我  
以少友文字言議相與講討甚相得也公白晢疎髯  
氣和而言簡莊以持身恬以處世粹然有古士大夫

風範余未嘗不畏服焉內行甚備年衰位顯而服勤  
如少時有妹早逝養其子女嫁娶而成立之平居手  
不釋卷裒輯東賢諸書多所發明雍容安舒未嘗有  
疾言遽色至於劈義理辨賢邪毅然有不可奪之操  
其在經幄開發啓沃隨事獻規 聖主爲之傾聽受  
知最深眷遇終始不替清名雅操爲士友所推趙東  
溪龜命李西堂德壽尹白下淳李澹軒夏坤皆忘年  
而許交斯可見公之槩矣初配海州崔氏郡守駿興  
女忠貞公奎瑞曾孫也生後公二年歿先公十八年  
後配延安李氏星輔女無嗣取族子老默子之娶承

旨李庚運女生二女並幼銘曰

昔我簪筆公在講筵從容敷奏有味其言引經獻箴  
動容 至尊鵠立荀班威儀可觀碧樓佩綬蓬閣理  
藩清風雅韻官如其人位至金緋不變儒冠無假吹  
噓知臣惟 君我言不僭公歸也全

耳溪集卷二十七 終





